


續文獻通考鈔

刑經籍系
封建彙編


十七
之
十一




內閣文庫	
番號	漢 2433
冊數	20 (17)
函號	294 17

政書八号

共二十





續文獻通考鈔卷之十七

古燕 羅 森約齋定

雲間 王 圻元翰著

秦郵 孫宗彥孝則鑒

廣陵

史以甲子仁鈔

李 蘅杜若正

徐元美懿公閱

史繼曠伯昌較

刑考

宋寧宗嘉定六年太學博士許應龍奏請刪定近制其畧曰臣聞有法之弊有例之弊法之弊易見例之弊難革法而用例今日之大患也夫若而為律疏而為令編次成書各有條目截然而不可易也是雖有旁照有通用舞文弄法者固未免輕重出入於其間然使有司精明詳考而熟察其奸莫能逃也豈不曰法之弊易見乎乃若例者或出於一時之特恩或出於一時之權宜有徇親故而開是例者有迫於勢要而

創是例者揆之于法大相抵牾而後來者扳援不已案牘在胥吏之手有司不可得而知也求者執已行之比有司不得而拒也豈不曰例之弊難革乎今百司庶府循積習之弊舍法而用例焉非不知三尺之皆違也執而不行恐至於拂人情甚至召衆怨遂使胥吏得以執其柄而容其私厚賂以賈之則以爲有例之可行請求之未至則匿其例而不用長吏知之而不能禁天下交病之而不敢言昔韓琦目擊其弊取其可用者而刪其冗繆是以吏無所容其奸今莫若明詔有司搜求前後已用之例參酌可不使輕重得宜於法意不相違戾編爲成書藏之有司凡有陳乞據此施行若是書所不載者皆抑而不予庶幾權不在吏而奔競妄求者無所容其巧矣

丘氏濬曰按宋史刑法志理宗朝天下之獄不勝其酷每歲冬夏詔提刑行郡決囚提刑憚行悉委倅貳倅貳不行復委幕屬所委之人

肆行威福以要餽遺監司郡守擅作威福意所欲黥則入其當黥之由意所欲殺則證其當死之罪呼喝吏卒嚴限日時監勒招承催僱結歛而又擅制獄具非法殘民有夾幫腦縮超棍等名富實之家稍有胥壘動籍其貲不問輕重並從科罰州縣往往專殺拘鎖滯滯囚繫死而後已又以已私摧折手足受豪強賂羅織平民囚殺之至度宗時雖累詔切責而禁止之終莫能勝而國亡矣說者謂宋以仁厚立國今觀刑法志所云則其一時司刑之吏刑人之具殆與漢武帝唐武后時無以異也卒至乖天地之和促國家之脈而召喬□之禍嗚呼豈無自而然哉

遼初阻午可汗知宗室雅里之賢命爲夷離董以掌刑辟其制刑凡有四曰死曰流曰徒曰杖死刑有絞斬凌遲之屬流刑量地遠近徒刑量年淺深加以黥刺杖刑自五十至二百凡杖五十以上者以沙袋決之

沙袋者穆宗時制用熟皮合縫之長六寸廣二寸柄二寸許又有木劍大棒鉄骨朶之法木劍大棒者太宗時制面平背隆大臣犯重罪欲寬宥則擊之棒之數三自十五至三十鉄骨朶之數或五或七有重罪者將決先以沙袋于脰骨之上及四周擊之拷訊之具有粗細杖及鞭烙法粗杖之數二十細杖之數三自三十至于六十鞭烙之數凡烙三十者鞭三百烙五十者鞭五百被告諸事應杖而不限者以此訊之外此有贖罪之法有八議八縱之法其餘非常用而無定式者不可殫紀

王氏曰遼史穆宗嗜酒及不恤政事五坊掌獸近侍奉膳掌酒人等以獐鹿野豕鶻雉之屬亡失傷斃及私歸逃亡在告踰期召不時至或以奏對少不如意或以飲食細故或因犯者遷怒無辜卽加炮烙鉄梳之刑甚者至于無筭或以手刃刺之斬擊射燎斷手足爛肩股折腰脛劃口碎齒棄屍于野且命築封于其地死者至

百有餘人京師置百尺牢以處繫囚及海里之死爲長夜之飲五坊掌獸人等及左右給事誅戮者相繼不絕雖嘗悔其因怒濫刑論大臣切諫然諫又不聽季年暴虐益甚嘗謂太尉化葛曰朕醉中有處決不當者醒當覆奏徒能言之無悛于事故及于難雖云虐止贄御上不及大臣下不及百姓然刑法之制豈人主快情縱意之具耶

景宗保寧三年以穆宗廢鍾院窮民有冤者無所訴仍命鑄鐘聖宗統和十二年七月詔契丹人犯十惡者依漢律初睿智皇后稱制留心聽斷嘗勸帝宜寬法律帝壯益習國事更定法令數端多合人心太平六年故事樞密使非國家重務未嘗親決凡獄訟惟夷離董王之及蕭合卓蕭朴相繼爲樞密使專尙吏才始自聽訟時人轉相效習以狡智相高乃下詔曰朕以國家有契丹漢人故以南北二院分治之蓋

欲去貪枉除煩擾也。若貴賤異法，則怨必生。自今貴戚以事被告，不以事之大小並今所在官司案問具申。北南院覆問得實以聞。
十一年耶律僕里篤知興中府，以獄空聞。
先是統和時，五院部民有自壞鎧甲者，其長佛奴杖殺之。上怒其用法大峻，詔奪官吏以故不敢酷敵。八哥始竊薊州王令謙家財，及覺以刃刺令謙，幸不死。有司擬以盜論，止加杖罪。又那母古犯竊盜者，十有三次，皆以情不可恕論棄市。近侍劉哥烏斯古嘗從齊王妻而逃，以赦後會千秋節出首，乃詔諸近侍護衛集視而腰斬之。於是國無倖免，綱紀修舉，吏多奉職，民重犯法。南京平易二州以獄空聞，後至諸道皆獄空，有刑措之風焉。

興宗重熙五年四月，新定條制成，詔有司定朝日執之，仍頒行諸道。蓋纂修太祖以來法令，參以古制，其法有死流杖笞及二等之徒，凡五百四十七條。初，上詔耶律庶成曰：「法令人命所繫，不可以不慎，卿其審度輕重，從宜修定。至是始成行之。」

道宗咸雍六年，帝以契丹漢人風俗不同，國法不可異施，于是命惕隱蘇樞密使乙辛等更定條制，凡合于律令者具載之，其不合者別存之。時校定官卽重熙舊制，更竊盜贓二十五貫處死一條，增至五十貫處死，又刪其重複者二條，爲五百四十五條，取律一百七十三條，又創增七十一條，凡七百八十九條，增重編者至千餘條。

天祚帝賞罰無章，怨黷日起，劇盜相繼，叛亡接踵。天祚大恐，益務繩以嚴酷，由是投擗砲擲釘割齧殺之刑復興焉。

金初法制簡易，無輕重貴賤之別，刑贖並行。天會以來，漸從吏議，以杖笞徒累及二百州縣，立威甚者置刃于杖，虐于肉刑。季年君臣好用箠管故習，由是以深文傅致爲能吏，以慘酷辦事爲長才，有司奸賊真犯

可決也而微過亦然風紀之臣失糾皆決考滿校其受決多寡以爲殿最原其立法初意欲以同踈戚一小大使成就繩約于律令之中莫不齊手並足以聽公上所爲蓋秦人強主威意也是以待宗室少恩待士大夫少禮終金之代忍耻以就功名雖一時名士有所不免至于避辱遠引罕聞其人若世宗臨馭法司奏讞或去律援經或揆義制法言幾于道鮮有及之者章宗宣宗猶有祖風簡牘所存可爲龜鑑穆宗時苦盜多欲皆殺之太祖日以財殺人不可財者人所致也遂立盜徵償法爲徵三倍

金舊俗輕罪笞以柳蔓殺人及盜劫者擊其腦殺之沒其家貲以十之四入官其六償主併以家人爲奴婢其獄則掘地深廣數丈爲之太宗時稍用遼宋法不循其舊矣

熙宗皇統間採隋唐之制參遼宋之法類以成書名曰皇統制頒行中

外

世宗大定元年立軍前權宜條理熙宗時有皇統制頒中外至海陵正隆時又任情變易有續降制書與皇統制並行及是以正隆之亂盜賊公行甲兵未息一時制旨多從權宜乃集爲軍前權宜條理

二十五年十二月禁女直人不得改稱漢姓學南人衣裝違者抵罪章宗明昌四年上以法不適平常行杖樣多不能用遂定分寸鑄銅爲杖式頒之天下

泰和元年十二月司空襄進新定律令勅條格式凡十二卷一曰名例二曰禁衛三曰職制四曰戶婚五曰廩庫六曰擅興七曰賊盜八曰鬪訟九曰詐僞十曰雜律十一曰捕亡十二曰斷獄實唐律也但加贖銅皆倍之增徒至四年五年爲七削不宜于時者四十七條增時用之制百四十九條因而畧有所損益者二百八十有二條餘百二十六條皆

從其舊又加以分其一爲二分其一爲四者六條凡五百六十三條爲三十卷附注以明其事疏義以釋其疑名曰泰和律義自官品令職員令之下曰祠令四十八條戶令六十八條學令十一條選舉令八十三條封爵令九條封贈令十條官衛令十條軍防令二十五條儀制令二十三條衣服令十條公式令五十八條祿令十七條倉庫令七條廐牧令十二條田令十七條賦役令二十三條關市令十三條捕亡令二十條賞令二十五條醫疾令五條假寧令十四條獄官令百有六條雜令四十九條釋道令十條營繕令十三條河防令十一條服制令十一條附以年月之制曰律令二十卷又定制勅九十五條權貨八十五條番部三十九條曰新定勅條三卷六部格式三十卷詔以明年五月頒行之

三年七月右司郎中孫鐸以詳定所校律文名例篇進既而諸篇皆成

復命中都路轉運司王寂大理卿董師中等重校之

五年正月復令鈎校制律卽付詳定所時詳定官言若依重修制文爲式則條目增減罪名輕重當異于律新律旣定復與舊同頒則使人惑而易爲奸矣臣等謂用今制條叅酌時宜準律文修定歷採前代刑書宜于今者以補遺缺取刑統疏文以釋之著爲常法名曰明昌律義

哀宗正大元年五月詔刑部登聞檢鼓院毋鎖閉防護聽有冤者陳訴徒流配沒

遼制流刑量罪輕重置之邊城部族之地遠則投諸境外又遠則罰使絕域徒刑一曰終身二曰五年三曰一年半終身者決五百其次遞減百又有黥刺之法其籍治家屬法亦奚官奴遺制也

興宗重熙二年有司奏元年詔曰犯重罪徒終身者加以捶楚而又黥面是一罪而犯三刑宜免黥其職事官及宰相節度使世選之家子孫

犯奸罪至徒者未審黜否。上諭曰：犯罪而悔過自新者，亦有可用之人。一黜其面，終身為辱，朕甚憫焉。

金世宗時，梁肅為濟南尹，進疏曰：刑罰世輕世重。自漢文除肉刑，罪至徒者，帶鐐居役，歲滿釋之。家無兼丁者，加杖准徒。今取遼季之法，徒一年者杖一百，是一罪二刑也。刑罰之重于斯為甚。今太平日久，當用中典，有司猶用重法，臣實痛之。自今徒罪之人，止宜居作，更不杖決，不報章宗。泰和元年，新律成，比唐制，仍增徒至四年五年為七。

元初未有法守，百司斷理獄訟，循用金律，頗傷嚴刻。及世祖平宋，疆理混一，由是減除繁苛，如定新律頒之。有司號曰至元新格。仁宗之時，又以格例條畫有關風紀者，類集成書，號曰風憲宏綱。至英宗時，復命宰執儒臣取前書而加損益，號曰大元通制。其書之大綱有三：一曰詔制，二曰條格，三曰斷例。凡詔制為條九十，有四條格為條一千一百五十。

有一斷例為條九十，有七。大槩纂集世祖以來法制事例而已。其五刑之目，凡七下至五十七，謂之笞刑。凡六十七至一百七，謂之杖刑。其徒法年數，杖數相附麗為加減。鹽徒賊既決而又錄之，流則南人遷於遼陽，迤北之地北人遷于南方，湖廣之鄉死刑則有斬而無絞。惡逆之極者，又有凌遲處死之法焉。蓋古者以墨劓剕宮大辟為五刑，後世除肉刑，乃以笞杖徒流死備五刑之數。元因之，更用輕典，蓋亦仁矣。世祖謂宰臣曰：朕或恕有罪者，使汝勿殺，必遲留一二日，乃覆奏斯言也。雖古仁君何以過之。自後繼體之君，惟刑之恤。凡郡國有疑獄，必遣官覆讞，而從輕。死罪審錄無冤者，亦必待報，然後加刑。而大德間王約復上言：國朝之制，笞杖十減為七，今之杖一百者，宜止九十七，不當又加十也。此其君臣之間，唯知輕典之為尚。百年之間，天下又寧亦豈偶然而致哉。然其弊也，南北異制，事類繁瑣，挾情之吏，舞弄文法，出入比附，用譎

行私而克頑不法之徒又數以赦宥獲免至于西僧歲作佛事或恣意縱囚以售其奸宄俾善良者喑啞而飲恨識者病之然元之刑法其得在仁厚其失在乎弛緩而不知檢也始定天下之刑笞杖徒流死五等杖罪既定曰天饒他一下地饒他一下我饒他一下自是合笞五十止笞四十七合杖一百十止杖一百七後乃於七之外反加十焉議者憚于更改遂沿襲爲常其徒一年者杖六十七一年半者杖七十七二年者杖八十七二年半者杖九十七三年杖一百七匿稅者笞五十犯私鹽茶者杖七十私宰馬牛者杖一百
初作憲典其篇二十有二曰名例曰衛禁曰職制曰祭令曰學規曰軍律曰戶婚曰食貨曰大惡曰奸非曰盜賊曰詐僞曰訴訟曰鬪毆曰殺傷曰禁令曰雜犯曰捕亡次之曰恤刑曰平反曰赦宥而終之以獄空則辟以止辟之效成刑期無刑之德可見矣

世祖至元十九年耶律鑄言前奉詔殺人者死仍徵燒埋銀五十兩後止徵鈔二錠其事太輕臣等依蒙古例犯者沒一女入仇家無女者徵鈔四錠從之

明朝主執法者刑部都察院大理寺也謂之三法司刑部掌刑名凡宗室勲戚官吏軍民蠻裔有犯必麗律例以成獄遂移大理寺讞而評焉都察院得糾劾之而辯其冤枉象刑之名五曰笞曰杖曰徒曰流曰絞斬死二等流三等徒杖笞並五等死刑最重曰凌遲徒流之重曰遷徒曰充軍大惡凡十曰謀反曰謀大逆曰謀叛曰惡逆曰不道曰大不敬曰不孝曰不睦曰不義曰內亂宥議凡八曰親曰故曰功曰賢曰能曰勤曰貴曰賈墨賊凡六曰監守盜曰常人盜曰竊盜曰枉法曰不枉法曰坐贓獄具凡七曰笞曰杖曰訊曰枷曰扭曰索曰錄凡兩京十三省死刑歲讞平之奏上請裁曰應減者下就輕二死三流一徒加者上就

重重不得至死。凡律例外有殊旨別旨詔例榜議，非經議著令者不得引比。凡死刑即決及秋決並三覆奏，蒞戮于市。凡重囚京師歲霜降五府九卿科道官會審于朝堂，慮而上請曰：「朝審情真者決，矜疑者成邊。」有詞者調司再問比律者監候五歲，請勅遣官出京府兩京十三省審錄，減釋冤濫者。凡重囚款服則決之，否則駁訊必服乃決。若駁再擬改，正曰「照駁」，三擬不當，糾問官曰「參駁」。律冤甚者移調問曰「審異」，再異則請下九卿會問曰「圓審」。凡已平允而猶未當者移，再問曰「追駁」。凡屢駁不改者，徑請發落曰「制決」。凡贖罪有力者視罪輕重為差，絞斬雜犯亦聽收贖。凡錄俘囚配沒給賜官司奴婢必籍產，不得及其先墳塋。賊罰諸物本值時估，參計之。易銀歲杪類入內府。凡夏月錄囚免笞刑，減徒流以下刑，辯重刑。凡提牢月更主事，在京之獄一人葺囹圄，固械繫而時飲食有病醫藥之。凡官有過犯錄之。凡大祭祀止刑。凡四方有大獄則

受命而往，成之以名例。攝科條以八字，括詞議以五服。參情法以墨，但識盜竊宗人不即市，官人不即獄，悼耄癯殘不即訊。凡各省三司直隸死刑並讞上已，乃聽決。按察巡按巡撫惟死刑呈部院轉讞。凡笞杖罪移審徒流以上奏審。凡律例無正條上下比，請曰「類奏」。平反刑獄狀吁法備而情以通，何仁至而義盡耶。

疏議曰：名者五刑之名，例則六律之凡例也。魏文侯造法經曰：具律漢加九章，而具律如舊。魏改為刑名第一，晉為刑名法例。北齊併為名例，後周復為刑名。隋復為名例，唐因之而折其數為六。宋定二百八十六條，分十二目，而名例未嘗改也。國朝因唐制，悉併為一。凡與今制不合者，如七品以上官府號官稱婦人官品色號五品以上妾有犯之類，悉皆刪去，而加以職官犯罪、軍官犯罪、流囚家屬應議者之父母有犯等條，總名曰名例。

直引曰古者五刑墨劓剕宮大辟始於虞周之時蓋刻額曰墨割鼻曰劓剕足曰剕淫刑曰宮死刑曰大辟是也前五刑乃笞杖徒流死始於隋唐宋今因之

太祖吳元年丁未冬十月命中書省定律令初以唐宋皆有成律斷獄惟元不做古制取一時所行之事爲條格胥吏易爲奸弊自平武昌以來卽議定律至是欲頒成法乃命中書省李善長叅知政事傅謙松滋人楊憲太史令劉基翰林學士陶安按察司滕毅文原僉事劉承等詳定律令因諭之曰律有連坐之條謂侵損傷人者衆吾以爲罰弗及嗣忠厚之至也自今民有犯者毋連坐又曰立法貴在簡當使言直理明人人易曉若條緒繁多或一事而兩端可輕可重使奸貪之吏得以夤緣爲奸則所以禁殘暴者反以賊良善非美法也務求適中以去煩庶庶可以爲久遠之法

洪武元年春正月以大明律令頒行天下

先是命李善長等奉詔爲令一百四十五條上之太祖曰律令者治天下之法也令以教之於先律以齊之於後古之律令至簡後世漸繁多至有不能通其義者何以使人知法意而不犯哉令旣難知是啟吏之奸而陷民於法朕甚憫之今所定律令芟繁就簡使之歸一直言其事庶幾易知而難犯書曰刑期于無刑天下果能遵令而不犯于律刑措斯亦不難哉故命頒行四方惟爾臣庶體朕至懷是年令處決重刑從秋後無得非時以傷生意

六年閏十一月命刑部尙書劉惟謙學士宋濂等更定大明律

先是李善長等詳定律令輕重頗乖上乃命濂等同刑部官凡四人講唐律每一篇成輒繕寫以奏上親爲裁定務協厥中明年成律其篇目一準之於唐曰名例曰衛禁曰職制曰戶婚曰廩庫曰擅興曰

賊盜曰圖訟曰詐僞曰雜律曰捕亡曰斷獄采用已頒舊律二百八十八條續律百二十八條舊令改律三十六條因事制律三十一條綴唐律以補遺一百二十三條合六百有六條分爲三十卷宋濂撰表以進至二十二年又命翰林院同刑部官將比年例律條參考折衷以類編附凡三百七十有六條曰名例律仍載于律書之首頒行之

何孟春曰皇祖有命百司官吏不可不讀律讀斯求以明之誰謂明習律法非吾儒事哉我皇祖欽定律條大抵承用晉唐舊文文深而旨奧士大夫乍讀或有所不逮而况于諸吏胥故大學士丘文莊公嘗言律須儒臣通法意者爲之解釋必使人人易曉不待探索考究而自悉則愚民各知所守奸吏不得容情賈法云

祖訓有云守成之君止守律與大誥並不許用黥刺荆劓之刑臣下敢有奏用此刑者文武群臣即時劾奏夫律所以明法也大誥所以濟恩也祖宗垂訓之意豈不邁成周之用中罰而長王國者哉是年八月更定親屬相容隱律惟謀反惡逆不用九年十月上覽大明律謂胡惟庸汪廣洋等曰古者風俗厚而禁網疎後世人心漓而刑法密是以聖王貴寬而不貴急務簡而不務煩夫立法得中然後可以服人心而傳後世昔蕭何作漢律九章張湯猶得以私意亂之况始未盡善其能久而無弊乎今律條猶有議擬未當者卿等可詳議更定務合中正仍具存革者以聞於是惟庸廣洋等復詳加考訂釐正者凡十有三條十五年壬戌令凡吏戶禮兵工五部凡有應問罪人不許自理俱赴刑部鞫之

十九年大誥三篇俱成

二十八年乙亥始令法司擬罪引大誥減等一切犯笞杖徒流罪名家

有大誥每減一等無者每加一等至今但有減等而無加等是年冬焚錦衣衛刑具先是天下臣民有犯俱令屬法司其有重罪送至京者或令收繫錦衣衛下鎮撫司推鞠用事者因而非法凌虐上聞之怒曰訊鞠者法司事也負重罪來者或令錦衣衛審之欲先得其情耳豈令其鍛鍊耶而乃非法如是命取其刑具悉焚之三十年夏上命刑部尚書劉惟謙續修律條分爲三十卷各屬于吏戶禮兵刑工凡四百六十條其六賊五刑喪服宗制皆繪成圖式復將以准皆各其及卽若列分八字之義古之刑刑黥劓宮等刑悉去不用律成進獻上覽之嘆曰此皆民命所關非但一代所當遵守雖萬世之下亦當行也

丘濬曰唐有律例之外又有令格式宋初因之至神宗更其目曰勅令格式所謂勅者兼唐之律也我聖祖於登極之初洪武元年卽爲大明令一百四十五條頒行天下蓋與漢高祖初入關約法三章唐高祖入京約法十二條同一意也至六年始命刑部尚書劉惟謙等造律文又有洪武禮制諸司職掌之作與夫大誥三篇及大誥武臣等書唐宋所謂律令格式與其編勅皆在是也但不用唐宋之舊名爾夫律者刑之法也令者法之意也法具則意寓乎其中方草創之初未暇詳其曲折故明示以其意之所在令是也平定之後旣已備其制度故載其法之所存律是也伏讀祖訓有曰子孫做皇帝時止守律與大誥而不及令而諸司職掌於刑部都官科下具載律與大誥中所條者可見也是誥與律乃朝廷所當世守法司所當遵行者也事有律不載而具于令者據以爲證用以請之于上可也此又明法者之所當知

嘉靖初主事霍韜疏曰天下軍衛一體也錦衣等衛獨稱親軍備禁

近也。錦衣復兼刑獄，不亦甚乎？天下刑獄付三法司，足矣。錦衣衛復橫撓之，越介冑之職，侵刀筆之權，不亦甚乎？光武崇高節名節之士，滿東都，以扶漢鼎。宋祖敦廉耻，刑罰不加衣冠，忠義之徒爭死沒世。今江西事變，死者四人而已，足驗今之喪廉耻，賊節義者衆也。顧不係所養乎？節義之士在乎平世，甚無用也。於變故求之，不得國事遂空。故夫保養士氣，敦崇節義，乃治天下者深遠慮也。士夫有罪，下之刑曹辱矣。顧使官校當衆執之，脫冠裳以就鎖牯，屈體貌以聽武夫朝列清班，暮幽汙獄，剛氣由此漸滅盡矣。不亦甚乎？使有重罪，或廢或誅可也。乃暮脫汙獄，朝立清班，解下拘擥，便披冕服，而武夫悍卒指之曰：某也。吾得辱之矣。某也。吾得辱之矣。小人遂無忌憚，君子遂昧良心，豪傑所以多山林之思，變故所以鮮節概之士也。

劉玉論刑獄疏，伏惟我朝太祖高皇帝肇跡民間，享國持久，備歷艱

難，飽諸物態，故立制定法，準今酌古，周備無遺。視漢唐宋爲過之。至刑獄一事，尤在所慎。旣設刑部以掌邦禁，又設都察院以司糾察兼之。問刑又設大理寺以專審錄。凡問過罪囚，具招送審。凡招不協，情不合律，駁回三次，改擬不當，將當該官吏具奏送問，謂之照駁。照者，照其情律也。若問有冤枉，囚自番異，不服則取供行移，改調隔別衙門，問擬二次，番異不服，則具奏會同九卿圓審，詳載諸司職掌與大明會典爲制甚密。及查見行條例，遇有重囚稱冤，原問官員輒難辯理者，許該衙門移文會同三法司錦衣衛堂上官就於京畿道會問辯理。果有冤枉，及情可矜疑者，奏請定奪。蓋使彼此精研，互相覺察，故爲問刑審錄之司者，敢不積誠竭慮，據情法以議其平哉。法得其平，人皆易知，易守而不犯，故刑罰得中，民獲措其手足。所謂刑可期于無刑也。柰何豐豫之餘，人心玩怠，問刑者不知五詞之審，審錄

者不知觀刑之中惟意出入百司視勘不究其所當究刑每濫於無辜不問其所當問罪常訛於非情苛碎煩擾長冗興姦俾良善無控訴之門狙詐得橫行之路以求實理為怪異以論舊章為狂愚遂使祖宗良法廢壞殆盡臣等有難盡言者今幸陛下剷除宿弊圖新化理臣等幸沐遭逢忝司平反以為照駁圓審之法不行則司刑者無所畏憚庶獄決不可清他若詳定法律考課官屬矜恤獄囚查革淹滯省節煩擾體悉吏隱又所以清獄之源也

讞審

金世宗大定二十五年后族有犯法者尚書省引八議奏上曰法者天下持平之器若親者犯而從減是使之恃此恣橫也昔漢文誅薄昭有足取者前二十年后族濟州節度使烏林達鈔兀常犯大辟朕未嘗宥今乃宥之是開後世輕重出入之門也宰臣曰古所以議親尊天子別庶人也上曰外家自異于宗室漢外戚權太重至移國祚朕所以不令諸王公主有權也至若議賢既曰賢矣肯犯法乎脫或緣坐則固當減請也

元太宗六年五月大會諸王百僚諭條令曰凡當會不起而私宴者斬諸出入宮禁各有從者男女以十人為朋出入毋得相雜軍中凡十人置甲長聽其指揮專擅者論罪其甲長以事來宮中即置權攝一人甲外一人二人不得擅自往來違者罪之諸公事非當言而言者拳其耳再犯笞三犯杖四犯論死諸千戶越萬戶前行者隨以木鏃射之百戶甲長諸軍有犯其罪同不遵此法者斥罷今後來會諸軍甲內數不足于近翼抽補足之諸人或居室或在軍毋敢喧譁凡來會用善馬五十匹為一羈守者五人飼羸馬三人守乞烈思三人但盜馬一二者即論死諸人馬不應絆于乞烈思內者輒沒與畜虎豹人諸嬪人製質孫燕

服不如法者及妬者乘之以驟牛狗部中論罪卽聚財爲更娶

世祖中統三年詔諸路詳讞冤獄至元三年遣使諸路慮囚

二十六年冬禁百官受饋酒食者籍其家貲之半

二十七年江淮省平章沙不丁以倉庫官欺盜錢糧請依宋法黥而斷

其腕帝曰此回回法也不允

二十八年頒行至元新格右丞何榮祖世業吏而榮祖尤所通習初以

分規治民禦盜理財等十事輯爲一書名曰至元新格至是奏頒行

二十九年申禁鞭背

時趙天麟上策曰天道莫大於生故春居歲首而王者法之以立禮

部其次莫貴於長故夏居春次而法之以立兵部又其次方及於殺

故秋居夏次而法之以立刑部竊見方今太罪囚徒鞫訊旣成司縣

具詞以申於路路覆鞫之以申達於上司上司遣理官覆察旣審而

後刑之慎之至也或有及立春之後所在行刑此亦似乎失天本意

也方春之月勾芒御辰萬殊有榮滋舒暢之容而無枯瘁蕭條之理

故王者順之於是乎掩骼埋胔禁止伐樹無覆巢無殺孩蟲無胎夭

飛鳥走獸毋焚山林凡羅網之類餒獸之藥毋出九門但當安萌芽

養幼少存諸孤命有司省囹圄毋肆掠止獄訟可也以卉草鳥獸之

微尙令被澤而况於人乎以獄訟肆掠猶禁止而况於刑人乎及乎

商風振起少皞司天鷹乃祭鳥霜飛蕭艾於是乎審斷戮罪乃所以

順陰氣之嚴凝助陽律之不逮也且春夏行刑則是春夏二時行秋

冬之令災殃之效具見古書非臣所能盡言也頃者連年變異不一

意或有以致之也伏望陛下仰稽天意載審刑章凡有罪當死以上

命省部秋冬遣理官出而執之凡罪不至死及非常之事宜速鞫者

不在此限外依上施行庶幾休徵薦至氣候相協

續文獻通考卷之十一
成宗元貞元年御史臺臣言內地盜賊衆多乞立條格督責所屬期至盡滅廉訪使陳天祥上疏曰盜賊之起各有所因除凶誘之天時宜且勿論如軍旅不息工役薦興厚歛煩刑皆足致盜中間保護滋長之者赦令是也彼強梁之徒執兵殺人有司盡力以擒之朝廷加恩以釋之且脫繫累暮卽行劫既不感恩又不畏法夫凶殘悖逆性已頑定誠非善化所能移惟嚴刑以制之可也天祥旣上疏乃嚴督有司追捕自山東南至漢江二千餘里多就擒者

大德七年四月左丞相答剌罕言僧人修佛事畢必釋重囚有殺人者有妻妾殺夫者皆指名釋之生者苟免死者負寃於福何有帝嘉納之武宗至大二年六月更僧俗相歐令皇太子言宣政院先奉旨歐西僧者截手詈者斷舌此法昔所未聞有乖國典僭俗相犯已有明憲請更其令

英宗至治二年二月纂集大元通志成一曰斷例二曰條格三曰詔赦總二千五百三十六條頒行天下時法制不一有司無所遵守命完顏納丹曹伯啟等纂集累朝條格而損益之凡爲條若干名曰通志而頒行之

至元間蘇天爵上奏曰國家自太祖戡定中夏法尙寬簡世祖混一海宇肇立制度列聖相承日圖政治雖法令之未行皆因事以立法歲月旣久條例滋多英宗始命中書定爲通制頒行多方官吏遵守然自延祐至今又幾二十年矣夫人情有萬狀豈一例之能拘加以一時官曹材識有高下之異以致諸人罪狀議擬有輕重之殊是以繁條碎目與日俱增每罰一事或斷一事有司引用不能遍舉若不類編頒示中外誠恐遠方之民或未識而誤犯奸貪之吏獨習知而舞文事至於斯深爲未便宜從都省早爲奏聞精選文臣學通經術

明於治體練達民政者圍坐聽讀定擬去取續為通制要在詳書情
犯顯言法意通融不滯于一偏明白可行於久遠庶幾民知所避吏
有所守

明太祖卽位之初懲元寬縱立法甚嚴而用之尤毫髮不少假凡臣民
有犯法應誅者輒無貸

洪武元年令處決重囚須從秋後無得非時以傷生意

三年庚戌令臣民有罪法當死者三覆五奏毋輒行刑

英宗天順二年令每歲霜降後該決重囚三法司會多官審錄永為定

例

憲宗成化十四年奏准凡真犯死罪重囚推情取具招詞依律擬罪明
白具本連證佐干連人卷俱發大理寺審錄如有招情未明擬罪不當
稱冤不肯服辯者俱駁回再問若招情明白擬罪合律輸情服辯者本

寺將審允緣由奏奉欽依准擬依律處決方纔回報原問衙門監候照
例具奏將犯人引赴承天門外會同多官審錄其審錄之時原問原審
并接管官員仍帶原卷聽審情真無詞者覆奏處決如遇囚番異稱冤
有詞各官仍親一一照卷陳其始末來歷并原先問審過緣由聽從多
官從公叅詳果有可疑或應合再與勘問通行備由奏請定奪

孝宗弘治十六年令凡盜賊賊杖未真人命死傷檢勘未明輒加重刑
致死獄中者審勘有無故失明白不分軍民職官俱照酷刑事例問革
為民

世宗嘉靖十年議准重囚家屬俱於二覆命下之日投遞鼓狀該科叅
詳與三覆奏本一同封進取旨行刑

審

熱審

肅宗宣德元年諭三法司曰古者夏孟斷剖薄刑出輕繫仲夏閱重囚

益其食所以順時令重人命也。我祖宗之時每遇隆寒盛暑必命法司審錄囚繫。今天氣嚮炎不分輕重而悉繫之。非欽恤之道。古人謂刑爲祥刑以其用之至當足以召和氣福國家。卿等當體此心卽量情罪輕重而區別之。務存平恕毋致深刻。

孝宗弘治六年四月太監韋泰傳旨如今天氣暄熱兩法司錦衣衛見監囚犯笞罪無干証的便放了。徒流以下的減等發落重囚可矜疑并枷號的都寫來看。

萬曆間刑科給事中楊應文因亢旱日久奏曰祖宗設司政之官律例之條五刑五罰森不可越。又慮無辜者或罹於法每年有熱審之令所謂熱審者誠恐輕重罪囚或有冤抑致傷和氣特差內官一員公同三法司堂上官將見監罪囚一從公審錄情實罪當監候聽決其有情可矜疑事無証佐可結証者具奏處治徒流以下減等發落

笞罪釋放毋令淹滯。從祖宗二百年來相傳家法蓋如此。今歲五年熱審之期見監法司者俱有更生之望獨計鎮撫司所監犯人未經法司審擬豈無事從証悞而情有可矜者乎。又豈無株連蔓引並無証佐鑿空駕虛無可結証者乎。一入桎梏淹延歲月三木囊頭暴於堦下流離瑣尾之狀蓋有不忍言者。且烈日爍金火雲凝日。蘊隆之毒充斥囹圄漸染成疫十日而九以其時則苦矣。諸犯嗷嗷熱審之舉不啻望歲。乃久繫於獄不得叅送法司定擬無論無罪被玉石俱焚之禍卽有罪者不能伏其辜亦非所以肅法紀而懾人心也。皇上頃從禮官言以入春來雨澤愆期深切儆惕命大小臣工痛加修省命順天等官竭誠祈禱大哉皇言蓋念旱久瘟作欲舉三輔之民而濡沫之耳。彼詔獄之中縲紲污穢沸騰上下有傷和氣獨非聖衷所軫念而欲生之日乎。職讀史至漢和帝幸洛陽寺錄囚徒理冤滯未

續文獻通考卷之二十一
及還宮而雨。宋太宗以早遣使分行諸路決獄。是夕雨未嘗不嘆。漢宋之君尚能恤冤民而格天心如此。况皇上聰明仁愛超出二君萬萬者。而祈求雨澤。豈徒一素服角帶一減膳徹樂之爲兢兢哉。所爲恤向隅之泣。照覆盆之冤者。端有見於今日矣。

朝審

太祖洪武三十年置政平訟理二旛。論罪囚上諭刑部曰。爾等每論囚引至朕前。雖詳其致罪之由。然一時裁決恐未得其情。自今惟武臣犯罪朕親審之。其餘但以所犯來奏。引至承天門外。其有未報欲訟理者。命行人持訟理旛。論之訟理。其無罪應釋者。持政平旛。宣德意遣之。成祖永樂二年十一月。上御奉天門錄囚。旣多矜宥。尙慮有冤抑者。復召錦衣衛鴻臚寺等官論曰。囚皆入於獄。則雖枉而不求辯。初至朕前。則畏威而不敢言。有此二者。刑法豈能皆當。爾等更以朕言從容審之。果尙有冤抑卽來白。

仁宗洪熙元年。面諭三法司。諸臣曰。人命甚重。帝皇以愛人爲德。卿等理刑宜贊輔德政。罔俾無辜含冤地下。傳國家之和氣。昔法吏有於死獄求生道者。天有顯報不在其身。在其後人。卿等勉之。遂令五府六部通政司六科同三法司會審。

王氏曰。按國制。凡重囚。京師歲霜降後。會五府九卿科道錄之。上請情真者。戍邊。有詞調司再問。比律者。監候。

恤刑

太祖洪武十六年。遣使錄囚於諸省。宣宗宣德八年。諭法司處決天下重囚。但憑所具之詞。寧無虛飾。人命至重。死卽不可復。其造的當。官分臨各處。同三司巡按監察御史及府州縣官。公同詳審。若情犯深重。果無冤枉。聽從處決。如情可矜疑。及番

續文獻通考卷之十一
異不服者仍監候具奏與之辯理。

孝宗弘治二年令法司每年立秋時將在外監候聽決重囚不分有無訴訟備查各囚籍貫姓名及在外見監問有無招擬一應死罪囚犯通行具奏轉行各該巡按御史會同都布按三司并分巡分守南北直隸行移差去審刑主事會同巡按御史督同都司府衛從公研審除情真罪當者照例處決果有冤抑者卽與辯理情可矜疑者徑自具奏定奪其未轉詳者責令轉詳未問結者督同問結俱要遍歷研審著爲令。

憲宗成化八年奏准今後五年一次請勅差官往兩直隸各布政司錄囚。

世宗嘉靖二十六年題准各該司府州縣遇五年一次本部差官審錄將充軍人犯除已經解發著伍外其餘不分曾否詳允及雖經定衛尙未起解者逐一開送審錄其經審錄官辯釋者務要遵照發落不許問

官偏抑阻撓

王氏曰按差官審錄本非冗員而當時司寇若廖莊者猶恐擾民嘉靖末年徵科常政撫按任之已有餘力當國者顧動勤制使供億浩繁此豈爲國恤民以固邦本之長慮哉

刑具

憲宗成化十一年國子祭酒周洪謨言天下有司聽訟輒用夾棍等刑具百姓不勝苦楚請勅法司禁約除人命強盜奸犯死罪須用嚴刑其餘止用鞭朴違者風憲官錄其酷暴以備考劾詔可之。

禁科罰

憲宗成化七年左都御史李賓等奏在外官司聽訊軍民詞訟動輒罰人財物始則暫寄官庫以欺人終則遞同吏役以入已至有假立文簿虛捏支銷昔唐臣陸贄有言建官立國所以養人賦人取財所以資國

今舍法而重罰。既非所以養人。罰物以爲私。又非所以資國。使不通行。禁革則貪風愈盛。末流之弊不可勝言矣。今後官司於軍民詞訟。悉依律問擬。或復科罰。悉治其罪。使無爲下民之害。從之。

贖刑 赦宥 寬卹

遼制品官公事。誤犯民年七十以上十五以下犯罪者。聽以贖論。贖銅之法。杖一百輸錢千。

金制親屬犯罪。欲以牛馬雜物贖者。從之。或重罪亦聽自贖。然無辨於齊民。則劓刵以爲別。

元時諸牧民官公罪之輕者。許罰贖。諸職官犯夜者贖。諸年老七十以上。年幼十五以下。不任杖責者贖。諸罪人。廢篤殘疾有妨科決者贖。

明答刑五答者。擊也。又訓爲耻。言人有小愆。法須懲戒。故加箠撻。以此之。漢用竹。隋唐以降用楚。楚水名。卽荆也。今川之。卽書曰朴作教刑是也。一十贖銅錢六百文。二十贖銅錢一貫二百文。三十贖銅錢一貫八百文。四十贖銅錢二貫四百文。五十贖銅錢三貫。

杖刑五杖者。持也。可以擊人者。蓋言持此杖以擊人。晉以前用鞭。隋唐以杖易之。今用之。書曰鞭作官刑是也。六十贖銅錢三貫六百文。七十贖銅錢四貫二百文。八十贖銅錢四貫八百文。九十贖銅錢五貫四百文。一百贖銅錢六貫。

徒刑五徒者。奴也。蓋奴辱之。謂男子入於罪戾。法當任以工役。卽漢之城旦舂是也。唐因隋文帝制三等。加爲五等。今仍之。一年杖六十贖銅錢一十二貫。一年半杖七十贖銅錢一十五貫。二年杖八十贖銅錢一十八貫。二年半杖九十贖銅錢二十一貫。三年杖一百贖銅錢二十四貫。

續文獻通考卷之七十一
流刑三流宥五刑謂不忍刑殺宥於遠使其離鄉土終身不返殆猶
水流一去不復返也蓋古者大罪役之四裔或海外及九州外中國
外始於唐虞今從之二千里杖一百贖銅錢三十貫二千五百里杖
一百贖銅錢三十三貫三千里杖一百贖銅錢三十六貫
死刑二古先哲王則天垂法輔政助化禁暴防奸本欲有生養之道
期止殺之功至不得已然後用刑而絞斬之罪刑之極也然斬自軒
轅絞與周代二者法陰數也陰主罰因而則之即古大辟之刑也但
絞則全屍斬則身首異處今仍唐制有絞斬絞斬贖銅錢四十二貫
按此五刑俱依律收贖如今法曹凡問篤疾并年七十以上十五以
下各依此銅錢貫數收贖鈔貫而誣告折杖不與此同又接近有五
刑收贖例凡老幼篤疾笞一十至三十折錢一文笞四十至杖六十
折錢二文杖七十至杖一百折錢三文徒一年折錢六文徒二年折
錢九文徒三年折錢十二文其餘殘疾風疾痰疾氣疾等項審無力
俱不准其收贖

管見曰贖罪鈔有律有例律鈔稍輕例鈔稍重復有錢鈔兼收各
折筭不同不得混收近時惟京師錢鈔便乃兼收在外錢鈔不便
故奏定折銀至如過失殺人者又有定例兼追錢鈔不可執一論
也

太祖時工部尚書王肅坐法當笞太祖曰六卿之職不宜以細故加辱
命以俸贖罪後來百官有過皆許贖俸蓋始此

論問刑衙門今後實犯死罪以下如律其雜犯死罪准徒收贖

何氏孟春謂王忠肅翔爲僉都御史在遼時治訟專行贖法雖人命
亦然曰償命無益死者之家而財或足以濟其用故行之不疑雖然
彼有財者亦必輕犯法矣指揮孫璟以公事鞭戍卒至死其妻女哭

之相繼死。或訴環殺一家三人。公曰卒死以罪。妻死於夫。女死於父。非殺也。令環償葬埋費。罷之。環後爲將。有名。非公優容不能也。戊卒妻。女法應旌。惜公未有以處此。竊謂昔人言赦者。小人之幸。然則贖法。豈非富翁之幸耶。忠肅偶一行之。以佐時艱耳。不然。令民輕犯。誠如所云者。而豈足師法哉。

刑科胡欝等言。律文矜疑二字。雖并言。至於求情定罪。則二字難並用。蓋所矜者。如或發於情之所不容已。或出於勢之不得不然。或迫於相激。或陷於無知。一旦至抵罪。此其情有可矜也。所謂疑者。曖昧不明。或始終互異。貼律則不協。比例則未合。擬以罪名。終未歸結。此其罪有可疑也。二字文雖聯絡。而意義甚不相蒙。今各省恤刑章奏。類可矜疑。概用無別。殊失律義。

元世祖詔釋天下囚。非殺人抵罪者。

趙天麟上策曰。赦者欲以蕩滌瑕穢。與民更始。以負罪者言之。則實莫大之洪恩。以致治者論之。則非太平之常事也。近世以來。郊天祝宗。建儲立后。未有不肆赦者。僥倖之子。逆知期會。能不啟非濫之心哉。且罹獄者。皆人之切心側目者也。及乎啼鳥夜啟。驛馬宵流。玉籥告靈。金鷄樹仗。雷雨一解。例皆釋之名。爲嘉吉之符。實皆變異之徵也。遂使攘劫服贓。而詭議善流。屏息而啣冤。養稂莠於良田。縱豺狼於當道。獨不念害嘉穀。而傷平民乎。風俗駭然。誠可憚也。又况大赦之後。姦邪未嘗衰止。朝脫囹圄。夕櫻縲綬。其不能承化自新。亦已明矣。書曰。文王作罰。刑茲無赦。志曰。太宗絕赦。四海安靜。子顏願無赦於光皇。孔明亦惜。救于蜀土。故得彌天息寇。闔境安生。此皆前世明主賢臣已然之效也。今國家哀囚徒之孽苦。憫小民之庸駭。頻降原赦。此蓋朝廷不忍人之心。刑于外而不能自己也。推此以及良民順。

天道以正生殺則周文之治不難同矣。又豈唐太漢光蜀國碌碌之足言哉。夫當罪而宥之當殺而生之亦猶來暄風于霜雪之辰行春令於秋冬之際如此而欲天道之成臣不知其可也。事作于下者象動于上感興於人者應發於天能無懼乎。易曰一陰一陽之謂道伏望陛下信賞決罰無肆赦宥使上下有紀內外絕倖則治天下可運之掌上矣。且使王符之類靡得而議焉。

順帝用帝師請釋放在京罪囚。

蘇天爵疏自昔國家務明刑政苟或赦宥之數行必致紀綱之多紊是以先王既興禮樂以教民又嚴法制以懲惡蓋禮樂興則教化洽法制嚴則姦貪懼未嘗數赦以病民也。昔我世祖皇帝卽位之初未嘗肆赦臨御既久聖德深仁丕冒天下是以刑政肅清禮樂修舉姦貪知懼善良獲伸故中統至元之治比隆前古欽惟聖天子承順天

心子愛百姓發號施令必先至仁踐祚伊始已降寬恩然自近歲以來赦宥太數誠恐姦人貪吏各懷僥倖大爲姦利非國之福也。夫以世祖皇帝在位三十五年肆赦者八近自天曆改元至元統初歲六年之中肆赦宥者九蓋敷恩宣澤雖出於朝廷之美意然長姦惠惡誠爲政者所當慎也。

明時詔恩各從其類上慈闈徽號則有廢子入監恩突異修省則有蠲逋減刑恩若建大工平大賊誅大奸亦有詔皆以類行惟蠲逋減刑每詔有之九廟灾時議下詔寬卹至有欲褒親廢子者其謬甚矣。

續文獻通考鈔卷之十八

古燕 羅 森約齋定

史以甲子仁鈔

雲間 王 圻元翰著

李 蘅杜若正

秦郵 孫宗彝孝則鑒

周延祚多祉閱

廣陵

史繼烜儀叔較

經籍考 內府書

宋理宗時翰林學士知制誥兼侍讀真德秀乞進讀文公朱熹大學中庸章句論語孟子集註從之

遼興宗重熙二十三年十月新建秘書監

道宗清寧元年十二月詔設學頒五經傳疏

金世宗大定二十三年八月以女直字孝經千部付提點司分賜護衛親軍制猛安謀克皆先讀女直字經史然後承襲

二十四年九月譯經所進所譯易書論語孟子楊子文中子列子及新唐書上謂宰臣曰朕所以令譯五經者正欲令女直人知仁義道德所在耳命頒行之

元太宗八年夏六月耶律楚材請立經籍所於平陽編集經史召儒士梁陟克長官以王萬慶趙著副之

世祖至元元年二月勅選儒士譯寫經書起館舍給俸以贍之

四年二月改經籍所爲弘文院

十五年三月以許衡言遣使至杭州等處取在官書籍版刻至京師

二十七年正月立興文署掌經籍板及江南學田糧穀

仁宗卽位遣使四方旁求經籍識以玉刻印章命近侍掌之時有進大學衍義者命詹事王約等節而釋之帝曰治天下此書足矣因命與圖像孝經列女傳並刊行賜臣下

明太祖洪武丙午夏五月命有司訪求古今書籍藏之秘府以資覽閱二年春二月詔修元史先是上謂廷臣曰元雖亡國事當紀載况史紀成敗示懲勸不可廢也遂以所得十三朝實錄命中書左丞相宣國公李善長爲監修前起居注宋濂漳州通判王禕爲總裁徵山東遺逸之士汪克寬等十六人同纂修開局天界寺取元經世大典諸書以資參考將成詔先成者進闕者俟續采補是年七月遣儒士歐陽佑等往北平等處採訪故元一統及至正事蹟三年春二月詔續修元史時佑等還朝上仍命濂等總裁以儒士趙勳等十四人同纂修是年七月續修元史成計五十有三卷紀十志五表二列傳二十六通共二百一十二卷濂等卒諸儒以進詔刊行之授諸儒士張宣等趙勳朱世濂乞還里許之

三年冬十二月辛酉大明志成先是命儒士魏俊民黃箎劉儼丁鳳鄭

續文獻通考卷之八十一
思先鄭權六人編輯天下州郡地里形勢降附始末爲書凡天下行省
十二府一百二十州一百八縣八百八十七安撫司三長官司一東至
于海南至瓊崖西至臨洮北至北平至是成
六年春祖訓錄成目凡十有三曰箴戒曰持守曰嚴祭祀曰謹出入曰
慎國政曰禮儀曰法律曰內令曰內官曰職制曰兵衛曰營膳曰供用
上親爲之序因謂侍官曰朕著祖訓錄所以垂訓子孫朕更歷世故創
業艱難嘗慮子孫不知所守故爲此書日夜以思具悉知慮細詳六年
始克成編後世子孫守之則永保天祿矣是年春三月昭鑒錄成先
是命禮部尚書陶凱主事張籌等採摭漢唐以來藩王善惡可爲勸戒
者爲書

七年夏五月朔纂修大明日曆翰林學士承旨詹同與侍讀學士宋訥
爲總裁官修之自上起兵臨濠至六年癸丑冬十二月止凡征伐次第
禮樂沿革刑政施設羣臣功過四○朝貢之類無不具載賜名皇明寶
訓自後凡有聖政史官日紀隨類增入是年冬十一月孝慈錄成
十三年寰宇通志書成初命儒臣以天下道里之類分方隅之目爲八
總類爲書至是成

十九年春省躬錄成先是上命翰林儒臣編輯歷代帝王祭祀祥異感
應可爲鑒戒者爲書名存心錄朝夕觀覽至是命贊善劉三吾編類漢
唐以來災異之應于臣下者別爲一書名省躬錄至是成詔刊行之
是年冬十月禮儀定式成禮部尚書李原名等取新舊增損條例爲款
一十有四分條三十有七共爲一卷遂命頒行天下時學士劉三吾董
倫皆有序是年冬十二月大誥三篇成詔頒示天下上曰朕出是誥
昭示禍福一切官民諸色人等戶戶有此一本若犯笞杖徒流罪名每
減一等遂爲令以故議罪得于本罪上有大誥減等已而又慮條誥所

載未盡乃續爲一編以申其意

二十五年秋八月頒醒貪簡要錄于內外諸司命戶部備錄文武大小官品歲給俸米之數以計其田畝出穀之數與日用多寡而爲之書頒示中外俾食祿者知所以恤民是年冬十一月永鑑錄成是書也輯歷代宗室諸王爲惡悖逆者直敘往事頒賜諸王又輯歷代爲臣善惡可勸懲者別爲書名曰世臣總錄以頒示中外人臣

二十六年春三月諸司職掌成是月又頒稽制錄于功臣

二十九年冬十一月稽古定制成命翰林斟酌唐宋制度遂定列墳塋碑碣丈尺房屋間架及食祿之家興敗禁例爲書

成祖永樂元年秋九月古今列女傳凡三卷成

二年甲申夏文華寶鑑錄成是書也輯自古以來嘉言善行有益于太子者

三年春正月十五日仁孝皇后內訓成是書凡二十篇

十一年丁亥十一月永樂大典成先是令解縉於天下百家凡天文地理陰陽醫卜僧道技藝爲一書賜名文獻大成已而上覽之謂其多有未備者乃復命太子少師姚廣孝刑部侍郎劉季篔及解縉督其事學士王景王達祭酒胡儼洗馬楊溥儒士陳濟爲總裁侍講鄒輯等二十人副之簡中外官及四方宿儒有文學者克纂修繕寫幾三千人凡四歷寒暑而成

十三年乙丑秋九月輯五經四書及性理大全等書成開館于東華門以胡廣等董其事命朝臣及在外教官有文學者同纂修光祿寺給饌至是成

十四年丙申冬十二月輯歷代名臣奏議成先是命楊士奇等採歷代奏疏有裨治道者輯爲書

十七年庚午三月爲善陰騭書成。

十八年辛丑夏五月孝順事實書成。

宣宗宣德三年春三月御制帝訓成。

七年壬子夏六月御制官箴書成。

英宗正統十三年夏五月五倫書成。

天順五年辛巳夏四月大明一統志成。

王氏曰按葉文莊云景泰中初修寰宇通志採事實凡例一準祝穆方輿勝覽予竊以爲祝氏此書趙宋偏安之物未可爲法况此書初爲四六設今欲成盛代混一之書要須有資軍國有益勸戒如地圖道里戶口之類皆未可闕必如永樂中志書凡例而克益之可也主議者其或未之思乎。

王氏整曰前代修史左史記言右史記動宮中有起居注如晉董狐齊南史皆以是守職司馬遷班固皆世史官欲通知典故親在廷君臣言動而書之後世讀之如親見當時之事我朝翰林皆史官立班雖近螭頭亦遠在殿下成化以來人君不復與臣下接朝事亦無可記凡修史則取諸司前後奏牘分爲吏戶禮兵刑工爲六館事繁者爲二館分派諸人以年月編次雜合成之副總裁刪削之內閣大臣總裁潤色其三品以上乃得立傳亦多紀出身官階遷擢而已間有褒貶亦未必盡公後世將焉所取信乎。

世宗嘉靖七年冬詔纂修大禮全書先是上欲推尊二親廷議紛紛不決至是禮成遂詔纂修更名明倫大典。

穆宗隆慶六年大學士張居正進帝鑑圖說是年上以冲年初卽位居正等欲廣上問學乃自三代漢唐迄於宋摘其行事可法戒者若干條各繪以像仍爲注說以進上嘉納之按圖說大綱凡二一曰聖哲芳規

其目凡八十一。蓋善爲陽爲吉，故用九九從陽數也。一曰狂愚覆轍其目凡三十六，蓋惡爲陰爲凶，故用六六從陰數也。

神宗萬曆二十四年十一月，湖廣蘄州生員李建元奏進本草綱目上命留覽。

經

易經著錄

吳澄著澄崇仁人，自幼知用力聖賢之學，著述甚多。其易經著錄序畧曰：昔在皇義始畫八卦，因而重之爲六十四，當是時易有圖而無書也。後聖因之作連山，作歸藏，作周易，雖一本諸伏羲之圖，而其取用蓋各不同焉。三易既亡其二，而周易猶存，世儒誦習知有周易而已。伏羲之圖鮮或傳授而淪落於方伎家，雖其說具見於夫子之繫辭說卦而讀者莫之察也。至宋邵子始得而發揮之，於是人乃知有

伏羲之易而學易者不斷。自文王周公始也。今於易之一經首揭此圖，冠於經端，以爲伏羲之易而後以三易繼之。蓋欲學者知易之本原，不至尋流逐末而昧其所自云爾。

書經洪範皇極內外篇

蔡沈師事朱熹，熹晚欲註書，遂以屬沈。又元定獨得洪範之數，隱居九峯，未及論著，曰成吾書者沈也。沈反覆數十年，遂成書傳及此書。

禹貢解

李方子著方子光澤人，朱熹高弟，天資近道，自號果齋。

詩傳疏義

朱公遷著公遷字克升，鄱陽人。其父梧岡翁聞同郡準軒吳中行得聞朱子門人黃幹之學於廣信，饒魯往準軒學焉。於是大肆力於學，經傳子史百家之書，禮樂律曆制度名物之數，無不貫通而悉究之。

初以遺逸徵至京師授翰林直學士力辭不許章七上乃出爲金華郡學正勤於著述剖析經傳極其精緻

春秋新義

家勤國著勤國眉山人與蘇軾兄弟爲同門友王安石久廢春秋學勤國憤之著爲此書

春秋外傳

河南苟宗道嘗傳春秋之學且志其說而無書以爲據乃以故所記憶者爲春秋外傳蓋自三傳之外而爲是不敢自同於三傳也以春秋正經多不同乃爲論次作章句音義八卷求聖人之意者必探其本以爲綱乃作制作本原三十一篇十卷春秋一書義在於事必比事而觀其義可見乃爲比類條目一百三十篇十二卷三傳之說不同故聖經之旨不一乃爲三傳折衷俾經之大義定于一凡五十卷

卷首又著三傳序論列國序論一卷其間訛缺謬戾者甚衆俟變通之日取諸書以考實之庶幾有成而見素患難之志云

三禮敘錄

吳澂纂次其序曰儀禮十七篇漢興高堂生得之以授瑕丘蕭奮奮授東海孟卿卿授后蒼蒼授戴德戴聖六戴小戴及劉氏別錄所傳十七篇次第各不同尊卑吉凶先後倫序惟別錄爲優故鄭氏用之今行於世禮經殘缺之餘猶有此十七篇爲完書以唐韓文公尚苦難讀况其下者自宋王文公行新法經義廢黜此經學者益罕傳習朱子考定易書詩春秋四經而謂三禮體大未能緒正晚年欲成其書於此至惓惓也經傳通解乃其編類草藁將俟喪祭禮畢而筆削焉無祿弗逮遂爲萬世之闕典澂每伏讀而爲之惋惜竊謂樂經旣亡經僅存五易彖傳本與繫辭文言說卦序卦雜卦諸傳共爲十翼

居上下經二篇之後者也。而後人以卦爻之中詩書之序本自爲十篇居國風雅頌典謨誓誥之後者也。而後人以冠各篇之首春秋三經三傳初皆列行。公穀配經其來已久。最後注左氏者又分傳以附經之年何居。夫傳文序與大經混淆不惟非所以尊經且於文義多所梗礙。歷千數百年而莫之或非也。莫之或正也。至東萊呂氏於易始因鼂氏本定爲經二篇傳十篇。朱子於詩書各除篇端小序合而爲一以寘經後。春秋一經雖未暇詳校而亦別出左氏經文併以刊之。臨漳於是易書詩春秋悉復夫子之舊。五經之中其未爲諸儒所亂者惟二禮經。然三百三千不存。蓋失之久矣。朱子補其遺闕則編類之初不得不以儀禮爲綱而各疏其下。脫藁之後必將有所科別決不但如今藁本而已。若執藁本爲定則經之章也。而以後記補記補傳分隸於其左也。與象象傳之附易經者有以異乎否也。經之篇

也。而以傳篇記篇補篇錯處于其間也。與左氏傳之附春秋經者有以異乎否也。夫以易書詩春秋之四經既去而正。而儀禮之一經又不幸而亂。是豈朱子之所以相遺經者哉。徒知尊信草創之書而不能探索未盡之意。亦豈朱子之所以望後學者哉。嗚呼。由朱子而來至於今將百年。然而無有乎爾。激之至愚不肖。猶幸得以私淑于其書。是以忘其僭妄。輒因朱子所分禮章重加倫紀。其經後之記依經章次秩敘其文不敢割裂。一仍其舊。附於篇終。其十七篇次第並如鄭氏本。更不間以他篇。庶十七篇正經不至雜揉。二戴之記中有經篇者。離之爲逸經。禮各有義。則經之傳也。以戴氏所存兼劉氏所補合之而爲傳。正經居首。逸經次之。傳終焉。皆別爲卷而不相紊。此外悉以歸諸戴氏之記。朱子所輯及黃氏喪禮楊氏祭禮亦參伍以去。其重複名曰朱氏記而與二戴爲三。凡周公之典其未墜于地者。蓋

經文通考卷之十八
畧包舉而無遺造化之運不息則天下之所秩未必終古而廢壞有議禮制度考文者出所損所益百世可知也

寧宗時朱熹乞修三禮劄子曰臣聞六經之道同歸而禮樂之用爲急遭秦滅學禮樂崩壞漢晉以來諸儒補輯竟無全書其頗存者三禮而已周官一書固爲禮之綱領至其儀法度數則儀禮乃其本經而禮記郊特牲冠義等篇乃其義疏耳前此猶有三禮通禮學究諸科禮雖不行而士猶得以誦習而知其說熙寧以來王安石變亂舊制廢罷禮儀而獨存禮記之科棄經任傳遺本宗未其失已甚而博士諸生又誦虛文以供應舉其間亦有因儀法度數之實而立文者則咸幽冥而莫知其源一有大議率用耳學臆斷而已若乃樂之爲教則又絕無師授律尺短長聲音清濁學士大夫莫有知其說者而不知其爲闕也故臣頃在山林嘗與一二學者考訂其說欲以儀禮爲經而取禮記及諸經史雜書所載有及於禮者皆以附於本經之下其列註疏諸儒之說畧有端緒而私家無書檢閱無人抄寫久之未成會蒙除用學徒分散遂不能就而鍾律之制則士友間亦有得其遺意者竊欲更加參考別爲一書以補六藝之闕而亦未能具也欲望聖明特詔有司許臣就秘書省太常寺閱借禮樂諸書自招舊日學徒十數人假空閒官屋數間與之居處令其編類雖官人亦不繫銜請俸但乞逐月量支錢米以給飲食紙札油燈之費其抄寫人卽乞下臨安府差撥貼司二十餘名候結局日量支犒賞別無推恩則於公家甚無費用而可以興起廢墜垂之永久使士知實學異日可爲聖朝制作之助則斯文幸甚天下幸甚

論語孟子考證

金華儒士金履祥著門人東陽許謙序之曰聖賢之心盡在四書而

四書之義備於朱子。顧其立言辭約意廣。讀者惟得其蘊而不能究其義。或以一偏之致自異。而不知未離其範圍。世之詆訾賢亂務爲新奇者。其弊正坐此耳。此金先生考證之所由作也。

樂律

胡氏律論 熊朋來曰。上古造律。次聽律。次後筭律。虞書周禮有聽律之官。無筭律之法。六觚一掘。自秦柱下史得此書。以行於漢。至今惟班馬猶可徵其餘言。上下生意同。甄漢中以禮運旋宮著在筭術。因除如法。而不免承後漢志之誤。後志誤於京氏準法。禮記疏亦與呂氏春秋淮南子同一說。是上下生且不定。何以筭律哉。律呂各自爲法。則乾坤六體之序定矣。同位娶妻。隔入生子之象著矣。倍因四因一損一益之筭均矣。若曰自子至午上生者七。自未至亥下生者五。既非子午中分。使丑午連并上生。而三呂用倍之意荒矣。後至十二律

之實。雜以筭法。而筭家輒因仍用之。以蕤賓夷則無射四因二除爲大呂夾鍾中呂之筭。非律生呂筭例矣。甄氏能辯其終於南呂之非。而不自知襲用後志之誤也。或謂大呂爲六呂之首。從後志則大呂得算爲多。是不然。陽得當位。陰得對衝。律生呂。自林鍾始。非先林鍾也。乃所以先大呂也。十二宮終於中呂。非中呂之窮也。當應鍾之次也。是故天統以黃鍾。人統以太簇。地統宜以大呂。而以林鍾。抗林鍾於大呂之位。所以配黃鍾。而母太簇。則大呂夾鍾中呂在。未酉亥之次。皆從下生之筭。入呂則加倍。有律之半。所以必有呂之倍也。知此則上下生之誤不足辯。用倍者其本法不用倍者。筭家取疾約法其實一也。若四清二變。昔者固亦疑之。李照范景仁不能爭。况陳暘以下託之空言乎。樂器惟瑟有十二清。而四清在其中。不能通行於他器也。吾觀中呂黃鍾之交。知聲音有出於度數之外者。無射之商。夷

則之角夾鍾之羽中呂之徵若彈絲吹竹擊拊金石聲音至此流轉自若也。筭家以中呂求黃鍾彈其術而不能合乎十七萬七千一百四十七之筭。有以倍數四因之者則三分之不盡二筭而虧數已多。有以正數四因之者則亦一筭不行而虧數且過半矣。三分不行之筭既未有以處之。紀其餘力有不盡之處。持未定之筭而謂之黃鍾變律。又推以爲林鍾太簇南呂之變。甚者托名執始不自信其爲黃鍾。縱使人得以窺筭術之涯涘而黃鍾流行諸律本無間斷也。筭法之起殆因律管有長短。此筭家因律以命術。非律命於筭也。猶之方田焉。田生五穀豈知我爲圭竇。弧環律以和聲豈知我爲正變。倍半皆筭家命之耳。故曰古之爲鍾律者以耳齊其聲。後人不能始假數以正其度。雅樂之不可興。聲音之學不傳也。古者自小學已教之六樂九數。今耄且罔知。豈惟筭律哉。若字音之學於儒者事最近。而喉唇二音官羽異說。羽有喻母。而或以從角音徵。有知母。而或以從商音矧。曰其有能協於皇極之律呂哉。昔西山蔡氏固疑呂氏春秋淮南子非本法。本法則三呂用倍矣。此書謂黍命於律。律不命於黍。吾於筭法亦云。又謂空圍九分。乃筭家內周非空中九分也。律有半呂有倍。使用半用倍。用正用變。各有倫理。凡有羽翼蔡氏之書。非求異也。當與本原辯證。並傳無所事雅樂。則已。倘有志於制作。將于是乎證焉。先生深於卦象聲韻。非止筭律也。姑以是傳世。亦賢於漢中太守矣。

小學

書史會要

宋景濂曰。天台陶九成宗儀。自青年精究六書之法。備知字文相生之意。乃辯析古文篆籀分隸行書諸家異同。并載其人而附見焉。先

續文獻通考卷之十八
之以帝王次之以名臣又次之以材士大夫起自三皇迄於國朝凡
名一善者悉具錄之其事核其論確而有徵皆徧採史傳及前修所
著書不復以其議參乎其間也史以記事此書記歷代之善書者故
名書史

洪武正韻學士樂韶鳳等校正

史

續後漢書

郝經自序曰晉平陽侯相陳壽故漢吏也漢亡仕晉作三國志以曹
比繼漢而不與昭烈稱之曰蜀鄙爲偏霸僭僞於是統體不正大義
不明紊其綱維故稱號議論皆失其正哀帝時滎陽太守習鑿齒著
漢晉春秋謂三國蜀以宗室爲正魏雖受漢禪尚爲篡晉平蜀而漢
始亡上疏請越魏繼漢以正統體不用宋元嘉中文帝詔中書侍郎

裴松之採三國異同凡數十家以註壽書補其缺漏辯其舛錯績力
雖勤而亦不能更正統體歷南北隋唐五季百有餘歲列諸三史之
後不復議爲也宋丞相司馬光作通鑑始更蜀曰漢仍以魏紀事而
昭烈爲僭僞至晦菴先生朱熹爲通鑑作綱目黜魏而以昭烈章武
之元繼漢統體始正矣然而本史正文猶用壽書經嘗聞縉紳先生
餘論謂壽書必當改作竊有志焉中統元年詔經持節使宋告登寶
位通好弭兵宋人館留儀真不令進退乃破稿發凡起漢終晉以更
壽書作表紀傳錄諸序議贊十二年夏五月借書於兩淮制使殷應
雷得二漢三國晉書遂作正史以裴註之異同通鑑之去取綱目之
義例參校刊定歸於詳實以昭烈纂承正統魏吳爲僭僞十三年十
月書成年表一卷帝紀二卷列傳七十九卷錄八卷共九十卷號曰
續後漢書奮昭烈之幽光揭孔明之盛心祛操丕之鬼蜮破懿昭之

城府千載之蔽一旦廓然矣。

遼史

金史

宋史

至正二年中書右丞相脫脫等同史臣纂修

楊維禎宋遼金正統辯畧

缺

初世祖立國史院首命王鶚修遼金二史宋亡又命史臣通修三史延祐天曆之間屢詔修之以義例未定竟不能成至正三年命脫脫為都總裁鐵木兒塔識張起巖歐陽玄呂思誠揭傒斯為總裁官修之或欲如晉書例以宋為世記而遼金為載記或又謂遼立國先於宋五十年宋南渡後常稱臣於金以為不可待制王理者祖謝端之說著三史正統論欲以遼金為北史太祖至靖康為宋史建炎以後

為南宋史一時士論非不知宋為正統然終以元承金金承遼之故疑之各持論不決詔遼金宋各為史凡再閱歲書成上之凡舉例論贊表奏多立屬筆云

按謝端辯宋遼金正統有曰正閏之論端雖不敏請以本末言之夫耶律氏自唐以來世為名族延及唐末朱溫篡唐四方幅裂遼太祖阿保機乘時而起服高麗諸國并燕雲以北數千里與朱梁同年即位是歲丁卯至丙子建元神冊在位二十年其子德光嗣位是歲丁亥唐明宗天成二年也德光後號太宗當天顯十一年河東節度使石敬瑭為清泰帝來伐遣使求救於遼奉表稱臣仍以父禮事之太宗赴援因以滅唐石氏稱晉遂以燕雲十六州獻于遼仍歲貢帛三十萬疋天福七年晉高祖昀出帝嗣位大臣議奉表稱臣告哀於遼景延廣請致書稱孫而不稱臣與遼抗衡太宗舉兵南下會同九年

入汴以出帝爲負義侯遷黃龍府石晉遂滅大同元年太宗北還仍以蕭幹留撫河南劉知遠在河東乘間而發由太原及汴自尊爲帝及乎宋受周禪有中原一百六十餘年遠爲北朝世數如之雖遠之封域偏於宋較其兵力而澶淵之戰宋幾不守因而割地連和歲貢銀絹二十萬兩疋約爲兄弟仍以世序昭穆降及晚年遠爲翁宋爲孫及至天祚金太祖舉兵平遼克宋奄有中原三分之二子孫帝王坐受四方朝貢百有餘年今以劉石等比之愚故不可不辯也夫劉淵石勒皆晉之臣庶叛亂國家以臣代君縱能盜據一隅僭至姚泓終爲晉將劉裕所虜斬建康市茲作載記理當然也完顏氏世爲君長保有肅慎至太祖時南北皆爲敵國素非君臣若如或所言金爲載記未審遼史復如何爾方遼太祖神冊之際宋太祖未生遼祖比宋前興五十餘年已接帝位固難降就五十年之後包於宋史爲載

記其世數相懸名分顛倒斷無此法既遼之世際宋不可前則金有中原尤難別議以公論處之據五代相因除莊宗入汴復讐伐罪理勢可觀外朱梁篡逆甚于王莽石晉因遼有國終爲遼所虜劉漢自立父子四年郭周廢湘陰公而立以五代之君通作南史內朱梁名分猶恐未應遼自唐末保有北方又非篡奪復承晉統加之世數名位遠兼五季與前宋相次而終當爲北史宋受周禪平江南收西蜀白溝迤南悉臣於宋傳至靖康當爲宋史金太祖破遼克宋帝有中原百餘年當爲北史自建炎之後中國非宋所有宜爲南宋史

端遂寧人

續資治通鑑

金簡紹王大安中詔儒臣楊雲翼等纂續

通鑑前編

蘭溪處士金履祥著嘗以劉恕外紀記司馬光通鑑以前事不本於

經舛繆不可信乃斷自尚書勿採子史損益之

通鑑續編

奉化陳桎著桎自束髮受父書思弘先人之業乃著筆記二百卷又上論盤古建于高辛會于有宋比事較義尊正統以定大分其紀年師司馬光補遺其書法師朱文公綱目名曰通鑑續編

通鑑外紀

高安劉恕著

元史

明太祖先命李善長宋濂王禕等修後命宋濂等編修

續編宋元通鑑綱目

瓊山丘濬著

續宋元資治通鑑

武進薛應旂編

通鑑綱目附釋

宋太史曰孔君克表歷考義例異同凡朱子微意先儒所未發及發之而未當者備疏其綱之在目中音義事證及名物度數之屬仍取史照胡三省王幼學三家會萃羣書而折衷之通成若干卷

傳記 地理 譜牒

御製四十八箴

宋理宗紹定六年製列爲十二軸揭于緝熙殿朝夕觀省左一曰敬天命法祖宗事親齊家右一曰親碩學精六藝崇節儉惜名器左二曰謹言語戒喜怒惡旨酒遠聲色右二曰伸剛斷肅紀綱核名實明賞罰左三曰廣視聽守信義懼滿盈究遠圖右三曰開公道塞倖門待耆老獎忠直左四曰儲人才訪屠釣尚儒術保勇將右四曰恤勤

勞抑貪競進廉退斥諂佞左五日鑒迎合絕朋比察讒間禁包苴右五日杜請託罷釋老謹刑獄哀鰥寡左六日傷暴露嚴罪已專爲民撫軍卒善使過右六日寬民力飭邊備旌死事懲偷生陳公益等撰述箴辭附于各條之下

爲君難七箴

秘書郎蔣重珍所進一日明心二日反身三日齊家四日遇大臣五日處七屬六日防私謁七日正百官

大明一統志

天順五年成初成祖命儒臣纂修未就至是命李賢呂原等重修凡九十卷

孔氏譜

揭傒斯曰孔氏世家一卷其派之在江西而顯者是爲臨江三孔三孔之子孫曰克已者是爲先聖五十五世孫由江西不遠三千里拜曲阜林廟且因以考訂其譜牒而收其所未續者遂之京師以示諸學孔子者傒斯得與觀焉

張真人世家

漢張道陵乃張良之裔擇居廣信府龍虎山世爲天師唐名其居曰真仙館宋大中祥符間改上清觀政和間賜名上清正一宮

子

說郭 輟耕錄

俱天台陶宗儀著宗儀倣曾慥類說而作說郭曾所編者則畧去之君子謂其尤精博云輟耕錄則隨其所見聞筆之朝野之事俱備足稱小史

授時曆

世祖至元十七年郭守敬等以爲金雖改曆止因劉宋之曆微加增益未嘗測驗於天况冬至者曆之本而求曆本者在驗氣汴宋舊儀今多不協乃與南北日官陳鼎臣等創造儀象圭表爲器凡十有三復遣監候官十四人分道測驗凡二十七所徧參曆法酌取中數成新曆上之言自漢以後曆法經七改創法者十三家今所考正者凡七事所創法者五事其法視古加密而又悉去諸曆積年月日法之傳會者一本天道自然之數可以施之永久而無弊

麻谷把曆

回鶻曆名也耶律楚材嘗言西域曆五星密於中國因作此曆

葬書新註

景濂宋氏曰葬書號爲郭景純所作後世葬巫競起而蕪穢之至於二十篇之多蔡季通刪去十二而存其八吳伯清又病蔡氏未盡蘊奧擇至純者爲內篇精麤純駁相半者爲外篇麤駁當去而姑存者爲雜篇新喻劉則章親受之吳氏爲之註釋頗有發明

東垣十書

李杲著杲鎮州人世以貴雄鄉里幼好醫捐千金從易州張元素學不數年盡傳其業學於傷寒癰疽眼目病尤長療而愈者甚衆當時以神醫目之

悟真篇

張用誠越人一名端字平叔嘗入城都遇真人得金丹術歸以所得作秘訣八十一首號悟真篇已而仙去淳熙中嘗至其家

傳法正宗

宋景濂曰宋明教大師契嵩博採三藏記洎諸家紀載釋迦爲表三十三祖爲傳持法一千三百四人爲分家畧傳而旁出宗證繼焉名

日傳法正宗記復畫佛祖相承之像明其世系名曰定祖圖中述禪經及西域諸師為證以闢學者之妄名曰正宗論其衛道之嚴凜凜乎不可犯也甬東祖杲禪師以誠篤契道恐法輪不運重刻以傳

類書

文獻通考

樂平馬貴與著貴與自以宋相廷鸞子義不仕元隱居著書首田賦次錢幣戶口職役征權市糴土貢國用選舉學校職官郊社宗廟禮樂兵刑經籍帝系封建象緯物異輿地終之以四裔總為二十四目一目中又各有小目上自唐虞以前下至宋季世代綿邈歷如指掌雖小有未備然亦弘博君子矣

永樂大典

永樂五年成祖命解縉纂集古今經史子集百工技藝為書名文獻大成至是以為未備復命姚廣孝劉季篔解縉等徵四方宿儒重加增輯計二萬二千九百卷一萬一千一百本

大明會典

弘治十六年命儒臣纂成凡一百八十卷嘉靖三十八年重修萬曆六年復修

大學衍義補

丘濬著

集

杜詩舉問

宋景濂曰杜子美詩註者數百家務穿鑿者謂一字皆有所出泛引經史巧為傳會誼讓而叢脞騁新奇者稱其一飯不忘君發為言辭無非忠愛之意至率爾咏懷之作亦必遷就而為之說近代廬陵大儒頗患之通集所用事實別見篇末固無繳繞猥雜之病未免輕加

批抹如醉翁寐語終不能了了會稽俞先生季淵以卓絕之識脫畧
衆說獨法序詩者之意各析章句具舉衆義于是燦然可觀晚所著
又有韓文舉隅而孝經易書詩禮記春秋離騷各有審問不但箋杜
詩而已

續文獻通考鈔卷之十八終

續文獻通考鈔卷之十九

古燕 羅 森約齋定

史以甲子仁鈔

雲間 王 圻元翰輯

李 蘅杜若正

秦郵 孫宗彞孝則鑒

廣陵 劉師教德論閣

史 奭壽平校

帝系考

宋

恭帝卽熈度宗次子全皇后生初封嘉國公度宗崩衆以建國公是長
當立賈似道王嫡乃立熈時方四歲謝太后臨朝次年伯顏入臨安群
臣奉帝出降封瀛國公端宗卽位遥尊爲孝恭懿聖皇帝

端宗名昀度宗妃楊淑妃所生德祐初封吉王進封益王帝熈降元陳
宜中以海船載昀走福州及三宮北去益王卽皇帝位元軍入福州帝

遂航海崩於化州之礪州。塋厓山在位三年。壽十一歲。帝曷卽位。上廟號曰端宗。

帝曷度宗第三子。俞修容所生。初封信王。進封廣王。帝曷降元。陳宜中以海船載曷。及是走福州。景炎中。進封衛王。端宗崩。張世傑、陸秀夫等共立爲帝。居新會之厓山。改元祥興。次年二月。張世傑與蒙古張弘範戰于厓山。兵潰。陸秀夫負帝赴海。崩在位二年。壽九歲。

東都九主。一百六十八年。南渡九主。一百五十二年。前後共十八主。凡三百二十年。

遼

太祖大聖大明神烈天皇帝。姓耶律氏。諱億。字阿保機。小字啜里只契。用迭刺部霞瀨益石烈鄉耶律彌里人。唐咸通十三年生。天復元年。痕德堇可汗立。以爲本部夷離堇。專征伐。連破敵。有功。三年。拜于越總知軍國事。五年。痕德堇可汗徂。群臣奉遺命立爲主。九年。而建元。稱帝。在位二十年。稱帝十一年。崩。壽五十五。

世宗孝和莊憲皇帝。諱阮。小字兀欲。讓國皇帝長子。在位五年。爲察割所弑。壽三十四。

穆宗孝安敬止皇帝。諱璟。小字述律。太宗皇帝長子。在位十九年。爲近侍小哥盪人花哥庖人辛古等六人所弑。壽三十九。

天祚帝諱延禧。字延寧。小字阿果。道宗孫。父順聖皇帝。二十四年。爲金人完顏婁室等所獲。降。封帝爲海濱王。疾終年五十有四。

右遼五九人。起神冊元年丙子。終保大五年甲辰。共二百九年。追帝者二人。

讓國文獻皇帝。名倍。小字圖欲。太祖長子。神冊元年立爲皇太子。詔居東丹國。爲人皇太祖崩。率其國屬言于皇后曰。大元帥勲蓋中外。宜承

正統后從之。太宗卽位，倍居東冊。唐明宗遣人招倍，遂浮海適唐。明宗賜姓東冊，名慕華。又改姓李，名贊華。從珂將自焚，遣壯士害之。薨年三十八。歸櫬，葬醫巫閭山。太宗謚曰文武元皇帝。世宗謚讓國皇帝。大孝順聖皇帝，名濟道宗子。母曰宣懿皇后蕭氏。六歲封梁王。八歲冊爲皇太子。耶律乙辛誣害皇后，復誣奏蕭速撒等八人謀立皇太子。上命乙辛鞠治。杖皇太子囚之宮中，又廢爲庶人。囚之上京。乙辛竟遣私人盜殺之。其子天祚帝卽位，追尊大孝順聖皇帝。

皇太后 太皇太后

太祖元年正月卽帝位，尊祖母曰太皇太后，母曰皇太后。太宗天顯元年十二月尊皇太后爲太皇太后，皇后爲應天皇后。三年八月詔建應天皇后誕聖碑于坤寧州。八年十二月太皇太后崩。九年二月葬太皇太后于德陵。十年四月皇太后父族及母前夫之族二帳並爲國

舅以蕭緬思爲尚父，領之。大同元年太宗崩于樂城，世宗卽位于柩前，遣天德朔古解里等護梓宮先赴上京。太后聞世宗卽位，遣太弟李胡率兵拒之，相持數日，用屋質之，謀各罷兵。旣而聞太后李胡復有異志，遷于福州。是年八月尊母蕭氏爲皇太后，以太后族刺只撒古魯爲國舅，帳立詳穩以總焉。世宗被弒時太后同被難應曆三年六月應天皇后崩，謚貞烈，葬祖陵。

聖宗卽位時年十三，皇后奉遺詔攝政，尊爲皇太后。上率群臣上皇太后尊號曰承天皇后。二十四年十月率群臣上皇太后尊號曰睿德光啓，應運啟化承天皇后。二十七年十二月皇太后崩于行宮，謚神聖，宜獻皇后，葬乾陵。

興宗景福元年六月尊母元妃蕭氏爲皇太后。重熙元年正月皇太后御正殿受帝與群臣朝。是春皇太后誣齊天皇后謀逆，遣人弒于上京。

齊天乃聖宗正后無子元妃耨斤生興宗后養爲子聖宗太漸耨斤嘗
后曰老物寵亦有旣耶命左右扶出帝崩耨斤立爲皇太后護衛馮家
奴喜孫等希旨誣告北府宰相蕭浞卜國舅蕭匹敵謀逆詔命鞠治連
及后興宗聞之曰皇后侍先帝四十年撫育眇躬當爲太后今不果反
罪之可乎太后不從遷后于上京遣人加害崩年五十一十一月率群臣
上皇太后尊號曰法天應運仁德章聖皇太后三年五月皇太后還政
躬守慶陵二十年十一月率群臣上皇太后尊號曰仁慈聖善欽孝廣
德安靜貞純懿和寬厚崇覺儀天皇太后清寧元年九月尊皇太后爲
太皇太后皇后爲皇太后二年十二月上皇太后尊號曰慈懿仁和文
惠孝敬廣愛宗天皇太后三年十二月太皇太后崩謚欽哀塋慶陵太
康二年三月皇太后崩謚仁懿塋慶陵

后妃

遼因突厥稱后曰可敦國語謂之臙徑寒尊稱曰耨幹廢蓋以配后上
而母之云太祖稱帝尊祖母曰太皇太后母曰皇太后嬪曰皇后等以
徽稱加以美號質于隋唐文于故俗后族惟乙室拔里氏而世任其國
事太祖慕漢高皇帝故耶律兼劉氏以乙室拔里比蕭相國遂爲蕭氏
太祖淳欽皇后述律氏諱平小字月理朶其先回鶻人太祖卽位群臣
上尊號曰地皇后神冊元年加號應天大明地皇后太祖崩斷腕納于
柩太宗尊爲皇太后後以欲立少子李胡與世宗忤遷祖州崩年七十
五祔祖陵謚貞烈重熙二十一年更今謚

太宗靖安皇后蕭氏小字溫淳欽皇后弟室魯之女帝爲大元帥納爲妃
生穆宗及卽位立爲皇后十年崩于行宮謚彰德塋奉陵重熙二十一
年改今謚

世宗懷節皇后蕭氏小字撒葛只淳欽皇后弟阿古只之女帝爲永康

王納之生景宗天祿末立爲皇后明年秋生萌古公主在蓐察割作亂
弑太后及帝后乘步輦直詣察割請畢收殮明日遇害謚曰孝烈重熙
二十一年更今謚妃甄氏後唐宮人有姿色帝從太宗南征得之寵
遇甚厚生寧王只沒及卽位立爲皇后後爲察割所害景宗立葬二后
于醫巫閭山建廟陵寢側

景宗睿知皇后蕭氏諱綽小字燕燕宰相思溫女帝卽位選爲貴妃尋
冊皇后生聖宗景宗崩尊爲皇太后統和二十七年崩謚曰神聖宣獻
皇后重熙二十一年更今謚后明達治道又習知軍政澶淵之役親御
戎車信賞必罰將士用命聖宗稱遼盛王后教訓爲多

聖宗仁德皇后蕭氏小字菩薩哥睿智皇后弟隗因之女統和十九年
冊爲齊天皇后嘗以草筵爲殿式後爲欽哀太后誣害葬慶陵又欽
哀皇后蕭氏小字擗斤淳欽皇后弟阿古只五世孫黜面狼視入宮嘗

拂承天皇后楊獲金雞吞之膚色光澤勝常太后知有奇子已而生興
宗後誣仁德皇后致之死又誅立少子重元重元白帝帝收太后符璽
遷于慶州三年帝悔之親御奉迎孝養益謹而后常不懌帝崩無戚容
清寧初尊太皇太后崩謚欽哀葬慶陵

興宗仁懿皇后蕭氏小字撻里欽哀皇后弟孝穆之長女帝卽位入宮
生道宗重熙四年立爲皇后二十三年號貞懿慈和文惠孝敬廣愛崇
聖皇后道宗尊爲皇太后太叔重元與其子涅魯古謀反太后親督衛
士擒之太康二年崩謚仁懿

道宗宣懿皇后蕭氏小字觀音欽哀皇后弟樞密惠之女恣容冠絕工
詩善談論自制歌詞尤善琵琶重熙中帝王燕趙納爲妃清寧初立爲
懿德皇后后生太子濬有專房寵好音樂伶官趙惟一得侍左右太康
初宮婢單登教坊朱頂鶴誣后與惟一私樞密使耶律乙辛以聞詔乙

辛與張孝傑劾狀因而實之族誅惟一賜后自盡乾統初追謚宣懿合
葬慶陵。惠妃蕭氏小字坦思駙馬都尉霞林之妹太康二年立為皇
后以妹幹特懶先嫁乙辛子者宜子言于帝離婚納宮中八年皇孫封
梁王降為惠妃徙乾陵幹特懶還其家頃之其母燕國夫人厭魅梁王
伏誅貶妃為庶人幽宜州天慶六年召還封太皇太妃後二年奔黑頂
山卒葬太子山

天祥文妃蕭氏小字瑟瑟國舅大父房之女乾統初帝幸耶律撻葛第
見而悅之匿宮中後以和魯幹言禮納為文妃生蜀國公主晉王敖盧
幹尤被寵幸以柴冊加號承翼後以蕭奉先忌晉王誣南軍都統余觀
謀立妃與聞賜死

未有者也靖安無毀無譽齊天巧思乃奢侈之漸宣懿審音豈致
誣讎之階乎文妃能歌詩諷諫而謂謀私其子非矣簡憲艱危保
孤懷節之從容就義雖烈丈夫何以過之欽哀狠桀殺嫡而興宗
不能防閑其母惜哉

太子

天祥六子元妃生一子曰稚里七歲欲立為太子別置禁衛封梁王天
祚奔夏衆推稱帝改元神曆

公主

太祖一女質魯適淳欽皇后弟蕭室魯幼為與姑未封卒

可尊敬者坐于
與謂之與姑

遼故俗凡婚
燕禮推女子

聖宗女叢母重開泰七年封魏國公主進封秦國長公主改封秦晉國
長公主清寧初加太長公主初適蕭嘏不睦改適蕭海里不睦又適蕭

胡覲又不睦乃適韓國王蕭惠以帝女而改適者四

興宗女跋芹封魏國公主重熙末徙封晉國加長公主適蕭撒八不諧改適蕭阿速以婦道不修徙中京又適蕭窩匿

道宗女札里封齊國公主進封趙國適蕭撻不也不也坐昭懷太子事被害其弟訛都幹欲逼尚公主公主以訛都幹黨乙辛惡之未幾都幹以事伏誅天祚幼乙辛用事公主每以匡救為心竟誅乙辛大安五年薨

金

太祖應乾興運昭德定功仁明莊孝大聖武元皇帝本諱阿骨打後改

諱旻世祖第二子以收國元年正月即帝位建國號曰金取其堅又白為完顏氏部

也二年諳班勃極烈吳乞買及群臣上尊號曰大聖皇帝七年八月戊

申崩于部堵西行宮在位九年壽五十六

太宗體元應運世德昭功哲惠仁聖文烈皇帝本諱吳乞買改諱晟世

祖第四子太祖母弟初為穆宗養子收國元年七月命為諳班勃極烈

太祖崩即帝位十三年正月崩于明德宮壽六十一

熙宗弘基續武莊靖孝成皇帝本諱合剌改諱亶太祖孫景宗子母蒲

察氏天會八年諳班勃極烈果薨定為儲二十三年即帝位九年平章

政事亮與所親駙馬唐括等謀亂弑帝時年三十一降帝為東昏王世

宗初元復帝號閔宗十九年升附太廟增謚二十七年改號熙宗

廢帝海陵庶人亮字元功本諱廸魯乃遼王宗幹第二子母大氏弑熙

宗自立六年完顏元宜等軍反遇弑在位十一年壽四十大定二年降

封海陵郡王謚曰煬二十年詔降為海陵庶人

世宗光天興運文德武功聖明仁孝皇帝本諱烏祿改諱雍太祖孫睿

宗子也母曰貞懿皇后李氏初封曹國海陵陰謀為害未發及南征軍

士遂立爲帝二十九年正月癸巳崩于福寧殿壽六十七

衛紹王諱允濟小字興聖世宗第七子進封衛王章宗無嗣承遺詔卽帝位于柩前爲胡沙虎所弑降封東海郡侯貞祐四年追復衛王

宣宗繼天興統述道勤仁英武聖孝皇帝本名吾覩補改諱珣顯宗長子衛紹王被弑徒單銘等迎卽帝位元光二年十二月崩在位十年壽六十

哀宗諱守緒初諱守禮又諱寧申速宣宗第二子宣宗崩卽位于柩前宋元兵逼傳位于承麟自焚幽蘭軒在位十一年壽三十二

右金帝九人起收國元年乙未終天興三年甲午共一百二十年追帝者三人

景宣皇帝諱宗峻本諱繩果太祖第二子在諸子中最嫡克遼西京有功太祖崩與兄宗幹率宗室群臣立太宗天會二年薨熙宗卽位上尊

謚曰景宣皇帝廟號徽宗改葬興陵

睿宗顯仁啟聖廣運文武簡肅皇帝諱宗堯初諱宗輔本諱訛里朶大祖第八子天會十三年薨年四十陪葬睿陵追封潞王謚襄穆世宗卽位追上尊謚廟號改葬于大房山號景陵

顯宗體道弘仁英文睿德光孝皇帝諱允恭本諱胡土瓦世宗第二子大定八年冊爲皇太子二十五年薨謚爲宣孝太子二十九年世宗崩太孫卽位是爲章宗追上尊謚祔廟陵曰裕陵

皇太后 太皇太后

海陵天德二年正月尊嫡母徒單氏及母大氏皆爲皇太后名徒單后宮曰永壽太氏宮曰永寧十一月以太后旨稱令旨元貞元年四月皇太后大氏崩大氏與徒單后甚相得徒單后嘗以海陵之弑熙宗爲非又后生日置酒大氏起爲壽徒單方與諸公主語大氏聽者久之海

陵怒曰今日之事豈能尚如前日邪明日召諸公主及宗婦與徒單語者皆杖之已遷中都獨留徒單於上京而大氏思念不已臨崩命海陵必迎致謹事之二年六月遂命右丞相僕散師恭大中正丞胡拔魯如上京迎永壽皇太后九月親迎皇太后於流沙河命左右約杖二束自隨跪謝久缺溫清罪十月皇太后至中都居壽康宮正隆四年正月朝皇太后於壽康宮外極恭順而心懷忿怒六年八月以皇太后諫伐宋命大懷忠等持詔見太后於寧德宮斥令跪受太后方下跪虎特未從後擊弑之仍命卽宮中焚其尸棄其骨水中

后妃

金代后不娶別族必甥舅之家有周姬齊姜之義初諸妃皆無位號熙宗始有貴妃賢妃德妃之號海陵後宮寢多元妃姝妃惠妃貴妃賢妃宸妃麗妃淑妃德妃昭妃溫妃柔妃凡十二位大定後宮簡少明昌以後大備內官制度諸妃視正一品比三夫人昭儀昭容昭媛修媛充儀充容充媛視正二品比九嬪婕妤九人視正三品美人九人視正四品才人九人視正五品比二十七世婦寶林二十七人視正六品御女二十七人視正七品采女二十七視正八品比八十一御妻又有尚官尚儀尚服尚食尚寢尚功皆內官也

熙宗悼平皇后裴滿氏初封貴妃天眷元年立爲皇后干預政事熙宗積怒殺之海陵弑熙宗以后死無罪追謚悼皇后大定間加謚悼平皇后祔葬思陵

睿宗貞懿皇后李氏世宗母遼陽人睿宗薨時世宗年十三后教以義方嘗謂親曰吾兒有奇相貴不可言居上京內治嚴肅臧獲皆守規矩衣服飲食器皿皆精潔敦睦親族周給貧乏宗室中甚敬之後有欲續娶者后乃祝髮爲比丘尼號通慧圓明大師賜紫衣歸遼陽營建清安

禪寺別爲尼院居之。正隆六年五月卒。世宗卽位。謚曰貞懿皇后。其寢園曰孝寧宮。

世宗昭德皇后烏林答氏。世宗在濟南海陵。召后来中都。后曰我不行。上必殺王。我當自勉。不以相累也。至良鄉自殺。大定二年追冊爲昭德皇后。世宗終身不立后。曰念皇后之德。今無其比也。章宗時有司奏太祖謚有昭德字。改謚明德皇后。

章宗元妃李氏名師兒。大定末以監戶女子入宮。時官教張建設青紗障。教諸宮女。惟師兒易爲領解。後章宗納爲妃。妃知文義。善伺候顏色。大見愛幸。明昌四年封爲昭容。又進封淑妃。遂欲立爲后。大臣固執不可。不得已進封元妃。章宗無嗣。立衛王。妃與完顏匡有力焉。而匡欲專爲已功。遂誣搆妃。欲令宮人詐作有身。計取他兒。充皇嗣。乃賜妃自盡。

皇太子

金初制度未立。太宗熙宗皆自諳班勃極烈。卽帝位。諳班勃極烈者。漢語最尊官也。熙宗立濟安爲皇太子。始正名位定制焉。

元

太祖諱鐵木真。姓奇渥溫氏。蒙古部人。其十世祖孛端叉兒。歿于八林。昔黑刺禿合必畜嗣。生子咩撚篤敦。爲押刺伊所滅。惟長孫海都得免。諸民共立爲君。海都歿。子拜惟忽兒嗣。拜惟忽兒歿。子敦必乃嗣。敦必乃歿。子葛不律寒嗣。葛不律寒歿。子八哩丹嗣。八哩丹歿。子也速該嗣。并吞諸部落。勢愈盛大也。速該崩。至元三年十月。追謚烈祖神元皇帝。初烈祖征塔塔兒部。獲其部長鐵木真。宣懿太后月倫適生帝。手握疑血。如赤石。烈祖異之。因以所獲鐵木真名之。帝旣立。滅汪罕。伐乃蠻。征西夏。拔力吉里寨。經落思城。大掠人民及其橐駝而還。元年丙寅。帝大會諸王群臣。建九旂。白旂卽皇帝位。於斡離河之源。諸王群臣共上尊

號曰歲吉思皇帝。壽六十五。葬起輦谷。至元三年冬十月追謚聖武皇帝。至大二年冬十一月庚辰加謚法天啟運聖武皇帝。廟號太祖。在位二十二年。

憲宗桓肅皇帝諱蒙哥。睿宗拖雷長子。太宗在潛邸。養以爲子。屬昂灰。皇后撫育之。及睿宗薨。乃命歸藩邸。從征伐。屢立奇功。歲戊申。定宗崩。諸王援都木哥等建議推戴。卽皇帝位於斡難河。遂改更庶政。命皇弟忽必烈領治蒙古漢地民戶。九年六月崩于釣魚山。壽五十二。在位九年。追謚桓肅皇帝。廟號憲宗。

世祖皇帝諱忽必烈。睿宗皇帝第四子。憲宗盡屬以漠南漢地軍國庶事。遂南駐。瓜忽都之地。憲宗殂。親王諸大臣勸進。辛卯卽皇帝位。二十一年春癸酉。帝崩於紫檀殿。在位三十五年。壽八十。承正統實計十六年。百官請謚於南郊上尊謚曰聖德神功文武皇帝。廟號世宗。

成宗諱鐵穆不。世祖之孫裕宗真金第三子。母徽仁裕聖皇后弘吉烈氏。至元三十一年春正月。世祖崩。夏四月甲午卽皇帝位。十一年春正月。帝崩于玉德殿。在位十三年。壽四十二。謚曰欽文廣孝皇帝。廟號成宗。

武宗諱海山。順宗荅刺麻八剌之長子。大德三年封爲懷寧王。十一年成宗崩。以世祖曾孫之嫡裕宗正派之傳卽位于上都。至大四年春正月。庚辰。帝崩於玉德殿。在位五年。壽三十一。百官也先鐵木兒等上尊謚曰仁惠慈孝皇帝。廟號武宗。

仁宗諱愛育黎拔力八達。順宗次子。武宗之弟。武宗崩。庚寅卽皇帝位。于大明殿。七年春正月辛丑。帝崩於光天宮。壽三十有六。在位十年。癸卯。葬起輦谷。從諸帝陵。五月乙未。群臣上謚曰聖文欽孝皇帝。廟號仁宗。

英宗諱碩德八剌仁宗嫡子延祐三年十二月丁亥立爲皇太子仁宗崩帝哀毀過禮素服寢於地日穀一粥三月庚寅帝卽位於大明殿五月壬辰朔車駕幸上都還駐南坡鐵失赤斤鐵木兒等弑帝於行幄年二十一從葬諸帝陵泰定元年二月上尊謚曰睿聖文孝皇帝廟號英宗

泰定皇帝諱也先鐵木兒顯宗甘麻剌之長子裕宗之嫡孫初嗣晉王仍鎮北邊英宗遇弑諸王按梯不花奉皇帝璽緩北迎帝于鎮所癸巳卽皇帝位於龍居河致和元年七月庚午帝崩于上都年壽三十六帝雖裕宗長孫以自立故文宗不爲立廟謚止稱爲泰定帝

王禕曰武宗以兄弟相及約繼世子孫迭居大位而仁宗惑於儉言不踐宿諾傳位英宗乃使武宗二子明宗文宗出居於外及英宗遇弑而明宗在北文宗在南晉邸乘間入繼大統或謂晉邸非

所宜立雖然晉王於世祖孫也於次爲長雖守藩服嘗有盟書今國統之弗繼則求所當立者舍晉王之系將誰屬耶然則謂晉王非所宜立亦過也

明宗諱和世疎武宗長子成宗崩武宗入繼大統立仁宗爲皇太子命以次傳於帝仁宗立議建東宮時丞相鐵木迭而欲固位取寵乃議立英宗爲皇太子封帝爲周王出鎮雲南延祐七年仁宗崩英宗嗣立爲御史大夫鐵失等所弑晉王也先鐵木兒自立爲泰定皇帝泰定崩迎帝弟懷王於江陵正大位是爲文宗帝卽位於和寧之北遣武寧王徹禿及哈八兒禿立文宗爲皇太子庚辰帝暴崩年三十在位六月是月己亥皇太子復卽皇帝位上尊謚曰翼獻景孝皇帝廟號明宗

文宗諱圖帖睦爾武宗次子明宗弟武宗崩傳位于弟仁宗立英宗爲皇太子及英宗卽位出帝居於海南未幾鐵失等爲逆晉王自立爲泰

定帝召帝於海南之瓊州封懷王泰定皇帝崩於上都燕鐵木兒舉義馳驛迎帝至京師卽位于大明殿已遣使奉迎皇兄明宗皇帝於漠北明宗崩帝以明宗后之命卽位於上都文武百官上尊號曰欽天統聖至德成功大文孝皇帝至順三年帝崩於大都。在位五年壽二十有九元統二年上尊謚曰聖明元孝皇帝三月己酉祔於大廟後至元六年六月以帝謀爲不軌使明宗飲恨而崩詔除其廟主寧宗諱懿璘質班明宗第二子天曆二年封爲酈王至順三年文宗崩皇后導揚末命傳位於明宗之子帝卽位於大明殿二月壬辰帝崩年七歲在位二月至元四年二月辛酉謚曰冲聖嗣孝皇帝號寧宗順帝名妥懽帖睦爾明宗之長子母罕祿魯氏名邁來迪明宗后八不沙被讒遇害遂徙帝於高麗使居大青島中不與人接越一載詔天下言明宗在朔漠之時素謂非已之子移廣西之靜江寧宗崩燕鐵木兒請立燕帖古思文宗后曰吾子尚幼妥懽帖睦爾在廣西今年十三矣且明宗之長子禮當立之乃與大臣定議立帝四年六月帝卽位于上都至正二十八年大明兵至通州夜半開建德門北奔後二年因痢疾殂於應昌壽五十一在位三十六年大明皇帝以帝知順天命退避而去特號曰順帝封其孫買的里八剌爲崇禮侯

右元十四帝凡百六十二年自世祖滅宋混一至順亡國實計八十九年年追帝者四人

睿宗景襄皇帝諱拖雷太祖第四子太宗同母弟子十一人長憲宗次四則世祖也憲宗立追謚曰英武皇帝廟號睿宗至元二年改謚景襄皇帝

裕宗諱真金世祖嫡子十年立爲太子世祖春秋高江南行臺監察御

史請禪位於太子。太子聞之懼未幾遂薨。年四十三。成宗卽位。追謚曰文惠明孝皇帝。廟號裕宗。祔太廟。

顯宗諱其麻刺。裕宗長子。至元中奉旨鎮北邊。二十七年冬封梁王。出鎮雲南。二十九年改封晉王。移鎮北邊。世祖崩。晉王曰昔皇祖命我鎮撫北方。以衛社稷。又歷邊事。願服厥職。母弟鐵木耳仁孝。宜嗣大統。于是成宗卽帝位。而晉王復歸藩邸。元貞六年。王薨。年四十。子三人。曰也孫帖木兒。曰松山。曰迭里哥兒不花。英宗遇弒也。孫帖木兒以嗣晉王。卽皇帝位。追尊曰光聖仁孝皇帝。廟號顯宗。

順宗諱荅刺麻八剌。裕宗第二子。薨。年二十九。子三人。長曰阿木哥。封魏王。女侍郭出也妃所生者。曰海山。是爲武宗。曰愛育黎拔力八達。是爲仁宗。大德十一年秋。武宗卽位。追謚曰昭聖衍孝皇帝。廟號順宗。祔享太廟。

太上皇 皇太后 太皇太后

仁宗延祐六年。帝語左右曰。前代有太上皇之號。今太子且長。可居大位。朕欲爲太上皇。與若等遊觀西山。以終天年。群臣皆稱善。左司郎中月魯帖木兒曰。臣聞昔所謂太上皇。若唐玄宗。宋徽宗。皆當禍亂不得已而爲之。願陛下正大位。保無疆之業。前代虛名何足慕哉。帝乃止。泰定時。欲加號太后。曰太皇太后。命朝臣議之。監察御史自當曰。太后稱太皇太后。於禮不合。衆皆曰。英宗何以加皇太后號。曰。太皇太后。自當曰英宗孫也。今上子也。太皇太后之號。孫可以稱之。子不可以稱之也。議遂定。

順帝卽位。爲皇太后。置徽政院。設官屬三百六十有六員。元統二年十月。奉玉冊玉寶。上皇太后尊號。曰贊天開聖仁壽徽懿昭宣皇太后。至元元年正月。以上皇太后冊寶。遣官告祭天地太廟。八月。議尊皇太

后為太皇太后許有壬諫以為非禮不從十二月奉玉冊玉寶上太皇太后尊號五年八月詔曰不答失里本朕之嬪乃陰搆奸臣弗體朕意僭膺太皇太后之號迹其閨門之禍離間骨肉罪惡尤重揆之大義削去鴻名徙東安州安置

后妃

文宗皇后名不答失里弘吉刺氏天曆元年文宗即位立為后寧宗即位奉玉冊玉寶尊為皇太后順帝元統元年尊為太皇太后稱制臨朝至元六年詔去尊號安置東安州尋崩順帝答納失里皇后欽察氏弟謀逆事發走匿后宮后以衣蔽之因遷后出官丞相伯顏鵠后於開平民倉

王氏曰按后妃之制厥有等威其來尚矣元初因其國俗不娶庶姓非此族也不居嫡選當時史臣以為甥舅之貴蓋有周姬齊姜之遺意歷世守之固可嘉也然其居則有日幹耳朶之分繼承守宮之法位號之消名分之瀆則亦甚矣

裕宗徽仁裕聖皇后伯藍也怯赤一名闊闊真弘吉刺氏生順宗成宗先是世祖出獵道渴至一帳房見女子緝駝茸世祖從覓馬湏女子曰父母諸兄不在難以與汝父母歸出馬湏飲世祖世祖既去嘆曰得此等女子為人家婦豈不美耶後遂納為太子妃成宗即位尊為皇太后元朝正后皆用弘吉刺氏自太祖與族帳設誓同取天下世用其女為后猶契丹有國世用蕭氏為后也自正宮之下復立兩宮其稱亦曰二宮皇后三宮皇后三日一輪幸即書宣以召之苟有子則為驗遵金之遺制也

公主

元制非勲臣世族及封國之君莫得尚葦是以世聯戚畹者親視諸王

然秦漢以來惟帝姬得號公主而元則諸王之女亦槩稱焉

太祖高皇帝濠之泗州人姓朱氏字國瑞至正十五年起義兵丁酉下金陵置江南行中書省為右丞相封吳國公丁未即吳王位洪武元年正月初四日即皇帝位國號大明在位三十一年崩壽七十一葬南京孝陵神烈山立后馬氏

建文帝諱允文太祖孫懿文皇太子次子也洪武二十五年冊為皇太孫高皇崩即皇帝位改元建文在位四年及靖難兵入金川門宮中火起或言帝殞或言其變姓名出走及老歸京師育于西內不知所終或曰葬西山

成祖文皇帝太祖第四子高皇后馬氏出也初封燕王建文二年起靖難兵四年六月十七日即皇帝位改元永樂在位二十二年崩於榆木川壽六十五葬長陵廟號太宗皇后徐氏中山武寧王徐達女

英宗睿皇帝宣宗第一子宣宗即位立為皇太子宣宗崩即皇帝位改元正統十四年八月北狩九月初六日尊為太上皇帝景泰元年八月還居南宮凡七年天順元年正月十七日復登帝位八年正月十七日崩於乾清宮壽三十葬裕陵廟號英宗后錢氏

景皇帝宣宗第二子初封郕國王正統十四年英宗北轅乃即皇帝位改元景泰景泰八年英宗復辟仍為郕王是月薨壽三十謚曰戾葬金山成化十一年復皇帝號后汪氏

睿宗獻皇帝憲宗第四子十三年冊封為興王正德十四年薨謚曰獻

世宗肅皇帝睿宗第二子武宗無嗣帝以世子奉迎入繼大統四月二十一日即皇帝位改元嘉靖在位四十五年崩於乾清宮壽六十廟號

世宗葬永陵皇后陳氏

皇太子

懿文太子早薨 太祖長子

憲懷太子早夭 穆宗子

公主

寧國公主高皇帝第二女十一年下嫁駙馬梅殷殷汝南侯思祖子用
事建文時至永樂二年以嫌中讐死

安慶公主高皇帝第四女十四年下嫁駙馬歐陽倫二十八年倫以私
販茶樸殺

壽春公主高皇帝第九女下嫁駙馬傅忠穎國公友德子也王以二十
一年薨忠亦不食而死

江都郡主懿文太子長女洪武二十三年下嫁儀賓耿璿長興侯炳文
子也建文初進郡主為公主儀賓為駙馬後璿奪職王亦降郡主

永福長公主睿宗第三女嘉靖二年下嫁駙馬鄒景和四年王薨二十
一年景和以辭直醮壇削爵為民流徙吳郡

續文獻通考鈔卷之二十一

古燕 羅 森約齋定

史以甲子仁鈔

雲間 王 圻元翰輯

李 蘅杜若正

秦郵 孫宗彝孝則鑒

張 璜政先閱

史 奭壽平較

封建考

宋同姓

與芮燕懿王後希廬之子理宗弟理宗時封榮王度宗咸淳三年進封福王恭帝德祐元年授浙東安撫大使後俘於北

汝愚字子直太宗子元佐七世孫居餘干光宗末擁立寧宗末安社稷功為韓侂胄誣貶而死侂胄誅追封沂國公理宗時追封福王進封周

王

異姓

史浩字直翁明州郡縣人紹興中進士後位宰相封魏國公又封會稽郡王寧宗嘉定十四年追封越王

趙方字彥直衡山人淳熙八年進士理宗時知襄陽府與金戰有功封長沙縣男賜食邑

孟珙字璞玉隨州棗陽人理宗嘉熙元年封隋縣男四年進封子與元戰有功進封漢東郡侯淳祐二年進漢東郡公卒後贈太師封吉國公史彌遠字同叔浩之子淳熙十四年進士以擁立理宗官至太師左丞相兼樞密使由鄞縣男累封會稽郡王封衛王

史嵩之字子由彌遠之侄嘉定十三年進士官至右丞相兼樞密副使由鄞縣男累封永國公加食邑卒後贈少師追封魯國公

趙葵字南仲京湖制置使方之子少從父以軍功進淳祐九年特授樞密使兼叅知政事督視江淮京西湖北軍馬封長沙郡公累封信國公景定元年進封魯國公咸淳元年進封冀國公

江萬里字子遠都昌人理宗時以太學舍選出身度宗時拜叅知政事進封南康郡公後家居死節贈太傅益國公尋加太師

文天祥字端又字履善吉水人理宗時舉進士第一德祐時興義兵爲恢復計不遂衛王繼立於嶺南加少保封信國公

魏了翁字華父蒲江人慶元五年進士嘉熙元年以資政殿大學士通奉大夫致仕卒詔贈太師謚文靖賜第宅蘇州累贈秦國公

張世傑范陽人少從張柔有罪奔宋從呂文德後獨引兵勤王帝昺時拜少傅樞密副使封越國公死節于海中

外戚

韓侂胄字節夫琦曾孫也父誠娶高宗憲聖吳皇后女弟仕至寶寧軍

承宣使侂胄娶憲聖吳皇后姪女以父任入官立寧宗有功寶慶四年封豫國公復封平原郡王驕恣縱惡後斬其首畀金人

賈似道字師憲台州人制置使涉之子以父廕補嘉興司倉會其姊入宮有寵於理宗為妃寶祐二年加同知樞密院事臨海郡開國公欺君誤國安置循州為鄭虎臣所殺

藩鎮
寧宗時知潼川府魏了翁上言藝祖皇帝自大難永平首創唐末五季之弊外召藩鎮以還京師臨遣廷紳以為牧守天下莫不仰伏威斷之明然而守邊之臣則久其考任假以事權固不與內郡同也未幾而初意漸失極于比歲承平日久吳曦盈尺之紙足以驚奔列雉李元勵烏合之眾足以振擾三道張福千人之眾足以披靡群辟口闕梁洋三泉如履平地口闕斬黃三關如升虛邑嗟夫強榦弱枝之

弊乃至此極是焉得無以變通之乎

德祐初文天祥上言宋懲五季之亂削藩鎮建郡邑一時雖足以矯尾大之弊然國亦以寢弱中原陸沉痛悔何及今宜分天下為四鎮以廣西益湖廣而建闡于長沙以廣東益江西而建闡于隆興以福建益江東而建闡于番陽以淮西益淮東而建闡于揚州議竟不行

王氏曰按唐之衰以藩鎮擅權而宋之衰又病於藩鎮不立此時勢互異抑剗法有善耶故存二公之議以為謀國者鑑

外國
李壇全之子為蒙古江淮大都督景定三年以京東來歸詔封為齊郡王復其父官爵

陳日照安南國王也景定三年叛蒙古傳位於子光昺遣使貢象詔封光昺為安南王加封日照為安南大王初日照傳位於子求封太上國

續文獻通考卷之二十一

三

三

三

三

王下省臣議秘書省正字歐陽守道謂太上者漢高帝以尊其父累朝未之有改若賜詔書稱太上國王非便
遼同姓

秦王重元聖宗子太平三年封秦國王嘗白其母后謀立已事爲興宗所重立爲皇太弟道宗立爲皇太叔免拜不名兩朝皆賜金券後以子涅魯古誘之謀反軍潰自殺

魯王敖魯幹天祚子初封晉王出繼大丞相耶律隆運後喜揚人善勸其不能中外稱其長者保大二年以得人心欲立爲帝賜死或勸之逃敖魯幹曰安忍爲七尺之軀而廢臣子之大節遂自縊死

梁王雅里天祚子七歲欲立爲太子別置禁衛封梁王天祚奔夏衆推稱帝改元神曆

異姓功臣

韓延徽幽州安次人爲劉守光聘于遼述律后知其賢太祖立命參軍事攻党項室韋服諸部落延徽謀居多久之懷鄉歸唐復歸遼太宗朝封魯國公世宗時卒世爲崇文令公

高模翰渤海人避地高麗而歸坐殺人罪太祖知其才賞之太宗時援石敬瑭有功後援楊覃圍大捷車駕入汴加特進檢校太師封愆郡開國公

趙思溫盧龍人始從太祖攻渤海太守時自嵐憲間出兵援太原賜號協謀靖亂劍聖功臣累官檢校太師會同二年星隕于庭卒遣使賻祭贈太師衛國公

張儉宛平人統和十四年舉進士第一太平六年拜左丞相封韓王帝不豫受遺詔輔立太子是爲興宗賜貞亮弘靖保義守節耆德功臣拜太師中書令加尚父徙王陳

耶律隆運本姓韓名德讓匡嗣之子統和中賜姓名皇太后稱制總宿衛事加開府儀同三司兼政事令從太后出師禦宋師有功加司空封楚國公後拜大丞相進王齊又從太后南征許宋成而還徙王晉

蕭韓家奴奚長渤魯恩之後累官奚六部大王治有聲清寧初封韓國公又封蘭陵郡王後以平重元亂功封荆王賜資忠保義奉國竭貞平亂功臣太康初徙王吳四年例削一字王爵改王蘭陵

蕭德楮特部人太平中領牌印直宿累遷北院樞密副使清寧元年遷同知北院樞密使封魯國公重元之亂摧鋒力戰斬涅魯古首以獻論功封漢王

耶律阿思不知所出清寧初補祗候郎君以善射掌獵事重元之亂射殺涅魯古賜號靖亂功臣封漆水郡王後以風疾致仕加尚父封趙王卒年八十追封齊國王

蕭兀納六院部人以兄圖薦補祗候郎君太康初為北院宣徽使時乙辛害太子謀立和魯幹之子兀納諫止乙辛謀害皇孫又賴兀納以免帝嘉其忠封蘭陵郡王

耶律乙辛五院部人清寧五年知北院樞密使封趙王平重元亂進封魏誣害皇后太子又欲害皇孫奸謀頗露例削一字王爵改王混同後謀奔宋及私藏甲兵事覺縊殺之乾統二年發塚戮其屍

外戚

蕭孝先孝穆弟統和十八年尚南陽公主重熙中欽哀弒仁德皇后孝先謀居多封楚王後與太后謀廢興宗事覺太后遷慶州孝先恒鬱鬱不樂徙王晉卒

蕭孝友孝穆弟重熙元年累遷西北路招討使封蘭陵郡王八年進王陳十年賜效節宣庸定遠功臣更王吳後加翊聖協穆保義功臣進王

趙復爲東京留守徙王燕改上京留守更王秦清寧初益賜純德功臣致仕進封豐國王坐子胡觀與重元亂伏誅

蕭惠淳欽皇后弟阿古只五世孫初從征高麗有功開泰二年爲西北路招討使封魏公興宗時封鄭王歷徙趙齊韓王尚帝姊秦晉國長公主重熙十九年請老封魏國王

蕭奉先天祚元妃之兄累官樞密使封蘭陵郡王天祚欲誅阿骨打奉先阻之又勸天祚誅晉王人心解體後與其子並皆賜死

蕭革國舅房林牙和尚之子重熙初同知北院樞密事怙寵專權又拜南院樞密使班諸王上封吳王已改知北院進王鄭清寧元年復爲南院樞密使更王楚八年致仕封鄭國王九年秋以其子爲重元壻革預知其謀凌遲殺之

外國

太宗天顯十一年十二月册石敬瑭爲大晉皇帝

大同五年五月遣燕王牒謁樞密使高勳封劉崇爲大漢神武皇帝

聖宗統和八年十二月遣使封李繼遷爲夏國王

十三年十一月遣使册高麗王治爲高麗國王

天祚帝保大三年夏六月遣使册封夏國王李乾順爲夏國皇帝

金熙宗天眷元年十月始定封國制其制屬于吏部凡封王大國號二

十日恒明昌二年以漢遠唐宋梁秦殷楚類皆昔有天下之號不宜封臣下遂皆改之邵舊爲梁汴舊爲秦鎬舊爲秦

并舊爲漢益舊爲漢彭舊爲齊趙舊爲殷郢舊爲楚魯舊爲唐冀舊爲唐豫舊爲唐絳舊爲唐絳舊爲唐兖舊爲吳鄂舊爲吳

夔舊爲蜀宛舊爲漢曹舊爲漢次國三十日涇舊爲隋鄭舊爲隋衛舊爲隋韓舊爲隋潞舊爲隋幽舊爲隋潘舊爲隋岐舊爲隋代舊爲隋澤舊爲隋徐舊爲隋滕舊爲隋薛舊爲隋

紀昇舊爲原邢舊爲原翼舊爲原豐舊爲原畢舊爲原鄧舊爲原鄆舊爲原霍舊爲原蔡舊爲原瀛按金格葛當在此沂舊爲宋荆舊爲宋榮舊爲宋英舊爲宋壽舊爲宋溫舊爲宋小國三十

日濮舊爲濟遂舊爲濟道舊爲後改定舊爲後改景舊爲後改申舊爲後改崇舊爲後改宿舊爲後改息舊爲後改莒舊爲後改鄆舊爲後改郕舊爲後改舒舊爲後改淄舊爲後改邳舊爲後改萊舊爲後改避諱改之

杞舊爲後改向舊爲後改管舊爲後改密舊爲後改胙舊爲後改任舊爲後改載舊爲後改鞏舊爲後改將舊爲後改蕭舊爲後改莘舊爲後改芮舊爲後改封王之郡號十金

源廣平原南陽常山太原平陽東平安定延安封公主之縣號三十
樂安清平蓬萊滎陽棲霞壽光靈仙壽陽鍾秀惠和永寧慶雲靜樂福
山隆平德平文安福昌順安樂壽靜安靈壽太寧聞喜秀容宜芳真寧
嘉祥金鄉華原其封爵正從品級高下正從一品曰郡王曰國公正從
二品曰郡公正從三品曰郡侯正從四品曰郡伯正五品曰縣子從五
品曰縣男凡食邑封王者萬戶實封一千戶郡王五千戶實封五百戶
國公三千戶實封三百戶郡公二千戶實封二百戶郡侯一千戶實封
一百戶郡伯七百戶縣子五百戶縣男三百戶皆無實封

皇統元年正月定命婦封號一字王者母妻爲正從一品次室封王夫
人

承安二年敕王母妻止封王夫人次室封孺人郡王母妻封郡王夫人
國公母妻封國公夫人郡公母妻封郡公夫人郡侯母妻封郡侯夫人
五品文散少中大夫武散懷遠大將軍以上母妻封郡君五品文散朝
列大夫武散宣武將軍以上封縣君舊封鄉君後改

同姓

宗翰本名粘沒喝撒改子天會初封晉國王追封周宋國王正隆二年
例降金源郡王大定中改秦王

魯國王昌本名撻懶穆宗子天會十五年爲左副元帥封魯國王後與
翼王鶻懶謀反熙宗誅之

宋王宗望太祖子本名幹離不官左副元帥天會十三年封魏王皇統
三年進封許國王又徙封晉國王大德二年改遼燕國王正隆時例降
封大定二年改宋王

梁王宗弼太祖子本名兀术官太師領三省事右副元帥熙宗時封瀋
王又封越國王後封梁王

越王永功世子本名宋葛又名廣孫沉默寡言笑勇健過人涉書史好法書名畫大定四年封鄭王七年進隋王十一年進曹王明昌元年進冀王二年進魯王承安元年進郢王大安元年封譙王二年進越王異姓

婁室字幹里衍完顏部人佐太祖創業皇統元年追封莘王正隆時例降金源郡王

左企弓字君財蘇州人天輔中以燕京降仍封燕國公時虞仲文康公弼同降仲文封秦國公公弼封陳國公

李成字伯友雄州歸信人能挽弓三百斤聚眾為盜為宋兵所破遂歸劉豫豫廢歸金以功為河南尹都管押本路兵馬正隆間為真定尹封郡王例降封濟國公

孔彥舟字巨濟相州林慮人少無賴為盜後從劉豫伐宋又從宗弼取河南克鄭州有功累官兵部尚書漁色親女有禽獸行封廣平郡王正隆時例降封公

張中孚字信甫其先安定人宋慶國公達之子由宋歸金臣劉豫豫廢復歸宋金取河南又歸金身若趨市惟利所在封南陽郡王改封宿王又進封崇王卒後贈鄧王正隆時例降原國公

斜卯阿里父渾坦穆宗時內附阿里與石適懽擊高麗一日之間三破重敵尤習舟楫江淮用兵無役不從時人以水星目之為迭里部節度使歷順義泰寧軍歸德濟南尹天德初致仕加特進封王正隆時例降封韓國公

耨盪溫敦思忠斯水人太祖伐遼時未有文字思忠以口傳出入日至數千言無誤海陵時累官至平章政事封邵國公進拜左丞相兼侍中進封沂國公致仕後復拜太傅領三省事進封齊國公正隆間例降封

異姓惟思忠封廣平郡王賜以玉帶

劉筈以遠進士從父兄歸金元帥府約束廢置及四方號令多筈所畫
熙宗幸燕法駕儀仗亦筈所討論官至平章政事封吳國公天德元年
封滕王二年進封鄭又進曹卒年五十八

徒單合喜上京速蘇海水人膂力過人一有聞見終身不忘世宗九年
官平章政事封定國公

紇石烈良弼本名婁室回柏川人年十四爲北京教授學徒常二百人
十七補尚書省令史世宗時拜平章政事封宗國公居位幾二十年成
就太平之功一時號稱賢相卒後追封金源郡王

宣宗興定三年太原不守河北州縣不能自立詔百官議所以長久計
多請以高爵募土人使各保一方宰臣請多置公府宣宗意未決御史
中丞完顏伯嘉曰宋人以虛名致李全遂有山東實地苟能統衆守土

雖三公亦何惜焉宣宗曰他日事定公府無乃多乎伯嘉曰若事定以
三公就節鎮亦何不可宣宗意乃決四年二月封滄州經畧使王福爲
滄海公河間招撫使移刺衆家奴爲河間公真定經畧使武仙爲恒山
公中都東路經畧使張甫爲高陽公中都西路經畧使靖安民爲易水
公遼州從事郭文振爲晉陽公平陽招撫使胡天祚爲平陽公昭義軍
節度使完顏開爲上黨公山東安撫副使燕寧爲東莒公九公皆兼宣
撫使銀青榮祿大夫賜號宣力忠臣總帥本路兵馬署置官吏徵歛賦
稅賞罰號令得以便宜行之

外戚

石家奴蒲察部人祖斛魯短世祖外孫石家奴自幼時撫養太祖家及
長太祖以女妻之後伐遼宋屢有戰功熙宗時封蘭陵郡王除東京留
守卒後加贈鄖王正隆時奪王爵封魯國公

裴蒲達本名忽撻婆盧本部人爲人淳直孝友天輔六年從蒲家奴追
叛寇于鐵呂川力戰有功熙宗娶其女是爲悼平皇后天眷元年授世
襲猛安明年以皇后父拜太尉封徐國公皇統九年悼后死未幾海陵
弑熙宗欲揚熙宗過惡以悼后死非罪封忽撻爲王

蒲察鼎壽本名和尚上京曷速河人欽懷皇后父賦性沉厚有明鑑通
契丹漢字長于吏事尚熙宗女鄭國公主貞元三年海陵以女弟慶宜
公主子加定遠大將軍爲尚衣局使大定中歷官于外有惠政明昌三
年以皇后父贈太尉越國公鼎壽旣世連姻戚女爲皇后長子辭不失
凡三尚定國景國道國公主寵遇如此而不以勢驕人人稱爲外戚之
冠云

元宗室駙馬通稱諸王歲賜之頒分地之大所以盡夫展親之義者亦
優且渥然初制簡朴位號無稱惟視印章以爲輕重厥後遂有國邑之
名而章印之等猶前日也具著于篇

按元制封一字王者金印獸紐兩字王者金印螭紐次有金駝紐
金鍍銀印駝紐金鍍銀印龜紐有止用銀印龜紐等級不同如此
又同姓有無國邑而稱王者但曰宗王

忙哥刺世祖第三子至元十年封安西王益封秦王別賜金印其府在
長安者爲安西在六盤者爲開成皆聽爲官邸十七年薨二十四年中
書秦王次子按擅不花襲秦王印詔阿難答旣爲安西王其秦王印宜
上之然其後猶稱秦王阿難答

松山顯宗長子至元二十年以皇曾孫出鎮雲南封梁王
異姓

木華黎世居阿難太祖時以武功封太師魯國王至治元年追封其父
孔溫窟哇魯國王

廉希憲布魯海牙子。大德八年以賢臣追封魏國公。加恆陽王。

伯顏蒙古人。至元十八年頒群臣食邑。益伯顏滕州等處四千九百七十七戶。大德八年追封淮安王。至正四年進封淮王。

阿木兀良氏。世祖時以平宋功實封秦興縣二千戶。後追封河南王。哈剌哈孫幹刺納兒氏。世祖時有功。至大中追封順德王。

初仁宗之入也。阿忽台有勇力人莫敢近。諸王秃剌實手縛之。以功封越王。三官盡幸其第。賜予甚厚。以慶元路爲其食邑。哈剌哈孫力爭之。曰。祖宗之制。非親王不得加一字之封。秃剌疏屬。豈得以一日之功。廢萬世之制哉。帝不聽。

阿沙不花牙牙子。至正元年以賢相追封順寧王。其繼室別哥倫氏。初以寡居志節旌。後與元配達海的斤氏並封順寧王夫人。

脫脫字大用。伯顏姪。至正中以賢相封鄭王。食邑安豐。辭不受。

初燕帖木兒議封太保。伯顏王爵衆論附之。中書左司郎中白當偏曰。大保位列三公。而復加王爵。後再有大功。將何以處之。且丞相封王。出自上意。今欲加太保。王封宜請于上。王爵非中書選法也。遂罷其議。

察罕帖木兒。字廷瑞。北廷人。至正中討山東賊。爲張士誠所刺。追封忠襄王。改封潁川王。食邑沈丘縣。所在立祠。歲時致祭。封其父阿魯溫汝陽王。後又進封梁王。

秦不花。字謙善。伯牙吾台氏。至正十二年守台州。死于方國珍。後三年追封榮國公。

余闕。字廷心。一字天心。家世河西。威武人。後爲廬州人。至正十七年守安慶。死于陳友諒。追封幽國公。

福壽。唐兀人。至正十六年爲大明兵攻集慶城。破而死。追封衛國公。

耶律楚材字晉卿遼東丹王八世孫太祖時歸朝當國最久至順元年追封廣寧王

張柔字德剛定興人中統元年以武功封安肅公至元四年進封蔡國公

史天澤字潤甫秉直季子至元十二年以武功進封鎮陽王

張洪範字仲疇柔第九子至大四年以武功贈齊國公延祐六年加封淮陽王

劉秉忠字仲晦初名侃因從釋氏又名子聰其先瑞州人秉忠事世祖三十餘年小心慎密精于占術至元十二年封趙國公仁宗時進封常山王

姚樞字公茂柳城人至元十三年以翰林學士承旨卒追封魯國公許衡字平仲河內人至大二年以賢臣封魏國公

吳澄字幼清撫州崇仁人天曆中以賢臣追封臨川郡公

趙孟頫字子昂宋秦王德芳後家于湖州至治元年追封魏國公又封其曾祖師垂祖希永並吳興郡公父與訔魏國公

虞集字伯生宋允文五世孫至正八年以賢臣封仁壽郡公

揭傒斯字曼碩龍興富州人至正六年以賢臣追封豫章郡公

黃潛字晉卿婺州義烏人至正中以賢臣追封江夏郡公

歐陽玄字康公由廬陵遷瀏陽至正十七年以賢臣追封楚國公

李術魯神字子翬廣平人後至元四年以賢臣追封南陽郡公

董搏霄字孟起磁州人至正中死于河南毛貴賊追封魏國公弟昂霄同死追封隴西郡侯

李黼字子威潁人至正中守江州罵賊而死追封隴西郡公

田滋字榮甫開封人大德十年以良吏追封開封郡公

卜大璋字君璋洛陽人至順二年以良吏贈河南郡侯

杜瑛字文玉由信安徙河南緱氏天曆中以隱逸追封魏郡公

外戚

床兀兒欽察人尚也先帖爾公主武宗卽位封容國公二年封句容郡王後文宗以其子燕鐵木兒有大功封其曾祖父班都察溧陽王曾祖妃玉龍澈溧陽王夫人祖父土土哈昇王祖妣大哈爾昇王夫人父床兀兒楊王母也先帖爾公主察吉兒並爲楊王夫人

燕鐵木兒女伯牙吾氏爲順帝后以功封太平王進德王撒敦燕鐵木兒弟元統初封榮王唐其勢燕鐵木兒子襲封太平王後以謀逆誅恩澤

張與材龍虎山道士號正一天師漢張道陵三十六代孫武宗卽位來覲特授金紫光祿大夫封留國公錫金印

田忠良以方伎追封趙國公靳德進以方伎贈魏國公

孫威以工藝封神川郡公子拱封如其父阿尼哥尼以工藝封涼國公

鐵木迭兒者木兒火赤之子仁宗時以奸佞追封其三代並歸德王

搠思監亦憐真之子後至元十八年以佞倖封其曾祖孛魯海爲雲王祖也先不花爲瀛王父亦憐真爲冀王

塔塔統阿完顏伯顏燕家奴石抹明里并以乳母夫封國公妻國夫人

外國

世祖中統二年封陳光昺爲安南國王

至元十三年封宋王焜爲瀛國公

十五年封宋福王與芮爲平原郡公卒以子孟桂襲封

成宗大德十一年封高麗王距爲藩王

仁宗延祐三年封高昌王紐林的斤爲高昌王。

明太祖既正大位。大詔天下云。昔帝王之子居嫡長者必正儲位。其衆子當封王爵。分茅胙土。錫以其國。朕今有子十人。卽位之初。已立長子某爲皇太子。諸子之封。本待報賞功臣之後。然尊卑之分。所宜早定。於是卜吉日。廷册命王。置相傅。設官屬。定禮儀。列爵而不臨民。分土而不任事。外鎮邊圉。內控雄域。猗歟盛哉。

二百年以來。無變制之虞。有請祿之擾。自親王以至中尉。自儀賓以及縣君之類。繁衍之數。倍昔幾何。歲計之恩。倍昔幾何。國家經費之廣。殆無以踰焉。吏部侍郎張治嘗撰封建譜。有云。班固所謂親親賢賢。褒功表德。深根固本。不可拔也。我朝封諸王於國。而政不與焉。其所謂親愛富貴。仁至義盡者與。

洪武三年庚戌夏四月。封子奕等凡十人爲王。及其姪孫守謙爲靖江王。禮成。遂告太廟。宴群臣於奉天門文華殿。因諭廷臣曰。朕非私其親。乃遵古先哲王之制。爲久安長治之道。廷臣對曰。陛下封建諸王。以衛社稷。天下萬世之公議。太祖曰。先王封建。所以庇民。周行之而久遠。秦廢之而速亡。漢晉以來。莫不皆然。戊子詔更定皇太子親王等封爵册寶之制。皇太子親王俱授以金册金寶。皇太子妃王妃止授金册。不用寶。皇太子嫡長子爲皇太孫。次嫡子并庶子。年十歲皆封郡王。授以塗金銀册銀印。親王嫡長子年十歲。授以金册金寶。立爲王世子。次長子及庶子。年十歲皆封郡王。授以塗金銀册銀印。凡王世子必以嫡長。如或以庶奪嫡。輕則降爲庶人。重則流竄遠方。若王年三十。正妃未有嫡子。其庶止爲郡王。待王與正妃年五十。無嫡子。始立庶長子爲王世子。若王世子襲王。及王世子并郡王娶配郡王。受封並郡王嫡長子襲封。朝廷遣行人册命之。禮郡王子授鎮國將軍。孫授輔國將軍。曾孫授

奉國將軍立孫授鎮國中尉五世孫授輔國中尉六世孫以下授輔國中尉其有文武才能堪任用者宗人府具以名聞考驗陞轉如常選法如或有犯宗人府取問明白具實奏聞輕則量罪降等重則黜為庶人但明賞罰不加刑責著為令

秦王爽太祖第二子受封秦國西安

晉王岡太祖第三子受封晉國太原

晉王第三子慶成王生一百子俱長成自封長子餘九十九人並封鎮國將軍每會紫玉盈座至不識面人皆龍準此古今極異事也

燕王即成祖皇帝太祖第四子

周王肅太祖第五子受封吳國錢塘上謂浙江財賦地咬開封國號周即宋故宮為府建文中有告王反逮京竄雲南諸子並別流尋召還南京靖難兵入首復其爵

楚王真太祖第六子受封楚國

嘉靖乙巳正月辛亥子英耀弑父顯容獄具上命公朱希忠祭告祖廟斬于市焚屍揚灰

齊王專太祖第七子國青州建文初告王叛召至京廢為庶人與周王皆繫禁靖難兵入二王大喜曰吾屬幸不死矣出之復其封之國驕縱

上賜書諭飭來朝又面諭曰無忘患難時也王益懼遂陰結無賴刺客及僭帝號咒詛麗鎮等事軍人李琪曾名深等告變上匿之詔索琪且論專悔過未幾入朝專益出怨言遂召其子至京並奪爵會谷庶人絕而齊庶人得其第居焉

潭王辛太祖第八子受封潭國長沙以妃家坐事王不自安與妃俱自焚死無子國除

趙王巳太祖第九子受封趙明年巳卒

歷觀諸籍則明太祖實生廿七子而趙王已王子南俱殤故不傳但
趙王於庚戌一歲受封踰年卒則詔書云十子當有趙王也因其未
就國故逸之而後人遂以蜀王補焉考蜀王則洪武四年始生也土
禕代封諸王詔亦有第九子已為趙王第十子直為魯王云

魯王直太祖第十子封魯國兗州

靖江王守謙太祖姪孫也文正之子兄南昌王之嫡孫初南昌王早
逝太祖撫文正甚愛之隨渡江定建康命為大都督節制中外諸軍
事壬寅夏四月徐達再定南昌太祖曰南昌非骨肉重臣莫能治之
五月受命統元帥趙德勝薛顯同叅政鄧愈往鎮南昌友諒兵數臨
城幾破文正不為動守益力八月友諒死文正仍守南昌乃專任掾
吏衛達可等為心腹達可儉邪人也誘引非道文正日即荒淫按察
使李飲水僉事凌說廉其實劾奏之文正懼謀叛降張士誠太祖大

驚曰噫此子不才非吾自行不可即日登舟抵南昌迫城下文止倉
卒謁上泣曰汝為何輒起此意遂載與俱歸釋之免其官安置桐城
尋命往荊州築城竣事還畿欲用之文正又出不遜語命往濠州墓
祭夜與從者嘖嘖有異志從者以告太祖遂廢之乃召其子鐵柱語
之曰兒無恐爾父違訓教忘艱難恣寬狎貽我憂我育汝長且封汝
我終不以汝父廢汝未幾文正卒至是封為靖江王國桂林更名章

蜀王春太祖第十一子封為蜀王國成都

湘王白太祖第十二子國荊州建文初或告王反朝廷遣使即詔王
懼縱火焚宮奮身投火妃從之闔宮皆死謚戾無子國除

代王圭太祖第十三子封為豫王改封代王國大同

肅王英太祖第十四子初封漢王改封肅王國甘州建文初徙蘭縣

遼王直太祖第十五子二十六年癸酉春封先是居廣寧城有司以士

馬未集宮殿未建為言。上命王駐節大凌河。未幾召還京師。己卯之國靖難後請封荊州。從之。仍稱遼王。

慶王旒 太祖第十六子。國寧夏。封慶陽。徙韋州。建文三年冬移寧夏。永樂初許歲一至韋州度暑。

寧王權 太祖第十七子。國大寧。王多智善謀。從成祖起兵。靖難及成祖正大位。因乞改南王。初欲得蘇州。成祖曰蘇州圻內不許。又欲得杭州。成祖曰吾弟初封錢塘。為吳王。皇考以為不可。改開封。建文無道。封其弟允通為吳王。竟不克享。建寧荊州重慶東昌皆善地。惟弟擇焉。寧王得書遂出飛旗。令有司治馳道上。大怒。王不自安。屏衛兵五六老中官走南昌。稱病。卧城樓。乞封南昌。從之。傳至宸濠嗣。正德中以叛伏誅。國遂除。

岷王俊 太祖第十八子。受封雲南。建文時遣西平侯沐晟偵王。過遂被譴。流漳州。靖難後召還。復爵。永樂二年改封武岡。

谷王善 太祖第十九子。國宣府。建文初召入京。坐罪廢為庶人。命守金川門。靖難兵至。庶人開門迎謁。成祖正大位。賜雅樂七。奏衛士三百。及金綺寶鈔鎗劍與馬。增祿三百石。徙封長沙。茹瑺過其國。不朝。被繫死。有司以聞。上心愈疑。遣監察御史歐陽謙偵伺之。謙具以逆奏。庶人懼自焚死。國除。

韓王公 太祖第二十子。國開原。改平涼。

潘王英 太祖第二十一子。國潞州。

安王盈 太祖第二十二子。國平涼。無子。國除。

唐王瑩 太祖第二十三子。國南陽。

郢王東 太祖第二十四子。國安陸。無子。國除。

伊王襲 太祖第二十五子。國河南。傳至典英。嘉靖末有罪。國除。

南太祖第二十六子在諸王中最少生未逾月而卒

按金聲玉振載天潢玉牒云太祖皇子二十四人第四子今上第五子周王高后所生也長懿文太子第二子秦愍王第三子晉恭王諸母所生也第六子楚王第七子齊王第八子除名潭王第九子魯荒王第十子蜀王第十二子代王第十八子谷王第二十二子唐王第二十三子郢王第二十四子伊王皇妃所生也第十生子湘獻王第十三子肅王第十九子韓王第二十子藩王皇貴嬪所生也第十四子遼王第十五子慶王第十七子岷王皇貴人所生也第十六子寧王第二十一子安王皇美人所生也載頗不同姑記以俟考云

郕王祁玉英宗弟宣德十年乙卯春正月封正統十四年秋七月以郕王居守後卽位是爲景皇帝

興王祐 憲宗第二子先封爲興王國安陸弘治七年始就封生子一後卽位是爲世宗追上興王徽號曰睿宗

洪武二十八年乙亥秋八月更定宗人封爵郡王次子授鎮國將軍職三品次孫輔國將軍職四品次曾孫奉國將軍職五品凡三等次立孫鎮國中尉職六品次五世孫輔國中尉職七品次六世孫以下奉國中尉職八品凡三等親王女曰郡主郡王女曰縣主郡王孫女曰郡君郡王曾孫女曰縣君郡王立孫女曰鄉君凡五等靖江王府視郡王降一等

是年秋九月壬寅更定親王祿米先是太祖謂戶部尚書郁新等曰朕今子孫衆盛原定親王歲用祿米各五萬石天下官吏軍士亦多俸給彌廣其斟酌古制量減各王歲給以資軍國之用至是戶部議更定親王歲給米萬石郡王二千石鎮國將軍一千石輔國將軍八

百石奉國將軍六百石鎮國中尉四百石輔國中尉三百石奉國中尉二百石公王及駙馬二千石郡王及儀賓八百石縣王及儀賓六百石郡君及儀賓四百石縣君及儀賓三百石鄉君及儀賓二百石永樂間詔加鎮國將軍一品輔國將軍從二品奉國將軍從三品鎮國中尉從四品輔國中尉從五品奉國中尉從六品

凡修明宗範萬曆十年題准凡宗室之子年十歲以上俱入宗學其師卽以本府教授紀善等官選取學行俱優者充之若宗生衆多則分置數師或於宗室中推舉一人爲宗正主領其事令各生誦習皇明祖訓孝順事實爲善陰隲等書至于四書五經史鑑性理亦相兼講讀俟年至十五許照例請封先給祿米三分之一仍習學五年驗有進益親王府與奏請出學支本等全祿嘉靖四十四年例另城者該府郡王或管理府事郡王小則徑自訓責大則叅奏降革

凡罪送高牆國制宗人有罪者錮高牆高牆在中都今鳳陽府封建異姓

國朝初起淮甸旋定江東收拓疆宇統一華夏滅漢之功爲最取幽燕次之次汴洛秦晉齊魯次吳次閩越次蜀又次滇南當是時功臣封者食租衣稅雖不得分土臨民而鐵券寶綸天盟廟授追崇之禮過于商周世宥之恩寬於漢魏矣革除之後輝祖以守義釋囚景隆以負國淹繫江陰失律遠西長興喪師真定越雋安陸之流乍承收復終歸氓隸故其存者魏西平武定三家耳成祖靖難以九門壩上白溝滄州藁城夾河靈壁七戰論功已而北驅殘口南縛交酋西靖羗番東捕倭韓舊恩新績降口廝養徃徃登封洪熙宣德文教漸張九伯皆特轅欵塞合騎從征咸稱不僭正統景泰天順間醜戎猾夏奸黨貪天已巳丁丑剖符益衆未幾誅奪存亦無幾成化時國家治平屯細柳出居胥雖師律

尚嚴而檢覆多濫以故傳世者鮮弘治御極慎名與器封者無聞焉正德間典章頗濫世宗洗滌乾坤光復祖憲登極之詔首錄擒反已而秉鬯宗禋顧瞻烝侑悼念元勳興滅繼絕五姓續封於期善述若乃外戚恩澤封者洪武永樂未之前聞增壽雖文后介弟顧靖難密謀殞命廷闕長陵悼念子封定國至獻陵卽位景始以昭后恩封裕陵又封景弟昇自是進紀褒申更相援引世宗若曰后家封爵皇祖未有典制魏定封公雖緣戚里實開國靖難佐命功臣彭城惠安軍功居半可世如故他皆宜革徒以先朝恩命錄之且終其身自是慶陽太和皆罷封稍稍陳乞或得都督都指揮指揮云今攷累朝封者公十八人侯八十三人伯八十八人王一入外戚公一人侯五人伯十一人凡二百七人乃今世及者纔四十四人其以文臣封者公一人伯八人不得嗣者乃七人高皇帝初下建業草創未遑吳元年始拜功臣李善長徐達常遇春爲

國公而其他功臣之死勤事封疆者有國郡公侯伯子男之贈然往往一循元舊洪武三年始大啟封建皇帝之子爲親王親王之從庶子爲郡王而功臣則公侯伯三等有世襲有流爵罷子男不置公侯位正一品上伯位正二品上朝服進賢冠加籠巾貂蟬世襲者領鉄券流爵則否當是時封伯者僅二人忠勤之祿僅當侯三之一誠意至不能當六之一十年以後封東筦徽先祿遂與侯等至永樂初而始定居侯之下正一品之上其階勳皆與侯等而伯益重矣凡公侯伯之任入則掌叅五府總六軍出則領將軍印爲大帥督留都筦鑰轄漕綱運獨不得預九卿事大抵視漢以下獨隆崇云

國初封公者六人而魏國功最大祿秩亦最重中山侯宿將也以一言之悖而不獲公德慶侯鉅勳也一事之疵而不獲公永城封而貶東勝封而奪訓詞蓋凜乎斧鉞焉然至吉安江夏臨川東平之類抑何其

穢夷狼籍也。三年而後續侯者獨西番之役最盛。平雲南次之。其他以舊封伯錫爵。然至藍氏之誅。累而幾若掃矣。夫以馮宋公傳穎公之雄。而卒不免死。謂其不蔽法也。而諱之。卽諱之。猶不爲置。後至嘉靖百餘年間。初所封六公。僅一公在。二十八侯。進爲公者亦絕。而餘二十六侯。亡。里土乘駟之奉。後封四公。二十一侯。二伯。亦僅西平武定在耳。是時天子下明詔。追收實錄。故鄂國公遇春。曹國公文忠。衛國公愈。信國公和。後俱爲徹侯。誠意伯基。後仍爲伯。增其秩。天下翕然歸厚焉。文皇帝於建文四年七月下京師。卽大位。因其年爲洪武三十五年。又二月制詔吏兵部。差次從靖難功臣。遂封淇國等二公。城陽等十三侯。興安等十一伯。已又錄降附功。增晉公歲祿。封永春一侯。忠誠等三伯。明年封駙馬都尉袁容等二侯。遂追舊功。封豐城一侯。寧陽等五伯。三年復追舊功。進封新城侯。至是靖難封始究。六年論平安南功。進封新城西平二侯。皆爲公。增豐城侯雲陽伯祿各五百石。已進封清遠一侯。安遠建平二伯。終文皇之世。凡再大封。至睿皇帝之元年。論奪門迎駕功。進封武清侯爲忠國公。封太平一侯。興濟文安等四伯。已又封武功一伯。自是終諸帝世。僅一大封。而其他破軍殺將。戮亂僞工之特封者。不與焉。嗚呼。靖難諸將。臣從藩邸。起一旅之師。彈丸之地。出萬死者。三載而遂定宗社於泰山之固。此其績誠巨。然英主實在軍攻堅履危。斷自神授。又大戰不過十餘所。定軍府不過三四而已。毋論中山開平。其視曹衛宋穎而下。抑何徑庭也。定興之掃安南。固自偉。亦何能超潁川之下。滇蜀且久復失之。今高帝之盟白馬。指黃河而誓其功臣。鮮有存者。易世而後。所當僅如綫之。與萑苻之盜。首級數十。以至百積。封自伯而至侯。遂有公者。今胡以貂綿蟬聯也。以此况彼。誠不可同年而語。自孝宗而後。執政者始知愛守名爵。不輕畀而不能無畏于首尾。未暇

一一釐正之。然至新建之取叛王不煩天子璽書不費太倉水衡金錢
縛之於股掌。世宗猶或靳之。寧遠之摧東口積級至萬餘其所邁敵固
皆瑕然其積豈與他徹侯等而縉紳大夫猶斷斷有後言者何也。少所

見多所惟恒也。已上出
弇州集

恩澤

高皇帝無外家三尺之胤以故王爵廟貌雖極隆於楊徐而朱邸自功
臣外無兩者他若李隴西繇尚主而擔爵然亦岐陽大勲所推本而成
沐椒房之光寵其兄樸實不過叅省而又奪之獨于晚年梁公之券施
于寵妃之從子顯出相貴邸入陪禁御至建文而削奪識者以為非不
幸云。

文皇入纂之頃中宮猶在邸而仲氏已前開國夫固憫其禍收其悃而
執經者猶疑之然以中山之勲塞天地家有兩公胙及百代不為幸也
嘉靖二年帝念翊戴功封楊廷和蔣冕毛紀為伯誥券世襲及壽安太
后弟邵嘉興國太后弟蔣翰各封伯尋以給事中張九叙御史江淵主
事霍韜上疏言恩澤太濫各聽辭免止廢一子惟外伯封爵如故

昭皇后母儀奕世幾于文妣以故張氏得封一伯其後漸因之至有自
侯而進公者自保傅而進太師者然會昌主兵符而不能易人主之喜
怒壽寧建昌能易人主之喜怒而不能與外廷之進止其極不過富貴
其樂不過宮室狗馬聲色其威怒不過行閭開籬匹而已世廟憤壽寧
建昌之積侈執而繫僂之一時肅然而又申明考功令下所司悉裁諸
外戚之世封者獨定公以中山故彭城惠安以昭皇后故且半援帷幄
汗馬焉他則擁護止乎孝烈而家一襲晉接窮乎榮恭而不予世天下
服其公快其斷而不敢以少恩病之斯所以為肅也若夫中貴人之擅
柄殆有甚矣幸而未鑿其竅不敢身冒封爵而正德之亂其昆從以迨

斯養皆得濫竽焉嘉靖之封方士之無賴者居一矣皆未幾而奪削繼
之著為令甲萬世曉然知其非當可無慮也

續文獻通考鈔卷之二十終

續文獻通考鈔卷之二十一

古燕 羅 森約齋定

史以甲子仁鈔

雲間 王 圻元翰著

李 衡杜若正

秦郵 孫宗彝孝則監

廣陵 俞兼善人望閱

史繼詩志存較

象緯考

渾儀

元興定鼎于燕其初襲用金舊而規環不協難復施用於是太史郭守
敬出其所創簡儀仰儀及諸儀表皆臻精妙卓見絕識蓋有古人所未
及者其說以為昔人以管窺天宿度餘分約為太半少未得其的乃用
二線推測於餘分纖微皆有可考而又當時四海測景之所凡二十有
七東極高麗西至滇池南踰朱崖北盡鐵勒是亦古人之所未及為者

也自是八十年間司天之官遵而用之靡有差忒而凡日月薄食五緯
凌犯彗孛飛流暈珥虹霓青稜雲氣等事其係於天文占候者具有簡
冊存焉

世祖至元十三年立局改治新曆

郭守敬言曆之本在測驗而測驗之器莫先儀表今司天渾儀宋皇
祐中汴京所造不與此處天度相符比量南北二極約差四度表石
年深亦復欹側乃盡考其失而移置之既又列圖爽塏以木爲重棚
創作簡儀高表用相比覆又以爲天樞附極而動昔人嘗展管窺之
未得其的作候極儀極辰既位天體斯正作渾天象象雖形似莫適
所用作玲瓏儀以表之矩方測天之正圓莫若以圓求圓作仰儀石
有經緯結而不動則易之作立運儀中有中道月有九行則一之作
證理儀表高景虛罔象非真作景符儀月雖有明察景則難作窺几
儀曆法之驗在於交會作日月食儀天有赤道輪以當之兩極低昂
標以指之作星晷定時儀以上凡十三等又作正方案圭表懸正儀
座正儀凡四等爲四方行測者所用又作仰規覆矩圖異方渾蓋圖
日出入永短圖凡五等與上諸儀互相參考

十七年授時曆成

時太史令郭守敬與太史諸官同上奏曰黃帝迎日推策帝堯以閏
月定四時成歲舜在璇璣玉衡以齊七政爰及三代歷無定法閏餘
乖次西漢造三統曆百三十年而後是非始定東漢造四分律七十
餘年而儀式方備又百二十一年劉洪造乾象曆始悟月行有遲速
又百八十年姜岌造三紀甲子曆始悟以月食衝檢日宿度所在又
五十七年何承天造元嘉曆始悟以朔望及弦皆大小餘又六十五
年祖冲之造大明曆始悟太陽有歲差之數及星去不動處一度餘

又五十二年張子信始悟日月交道有表裏五星有遲速留逆又三十三年劉焯造皇極曆始悟日行有盈縮又三十五年傅仁均造戊寅元曆頗采舊儀始用定朔又四十六年李淳風造麟德曆以古曆章部紀元首分度不齊始總法用進朔以避晦晨月見又六十三年僧一行造大衍曆始以朔有四大三小定九服交食之異又九十四年徐昂造宣明曆始悟日食有氣刻時三差又二百三十六年姚舜輔造紀元曆始悟食甚泛餘差數以上計千一百八十二年曆經七十改其創法者十有三家自是又百七十四年聖朝統一六合肇造區夏專命臣等改治新曆臣等守用創造簡儀高表憑其測到實數所考正者凡七事一曰冬至自丙子年立冬後依每日測到晷景逐日取對冬至前後日差同者為準二曰歲餘自劉宋大明曆以來凡測景驗氣得冬至時刻真數者有六用以相距各得其時合用歲餘三

曰日躔用至元丁丑四月癸酉望月食既推求日躔得冬至日躔赤道箕宿十度黃道箕九度有奇四日月離白丁丑以來至今憑每日測到逐時太陰行度推筭變從黃道求入轉極遲極疾並平行處因考驗交食五曰入交自丁丑五月以來憑每測到太陰去極度數比擬黃道去極度得月道交於黃道六曰二十八宿距度太半少皆私意牽就今新儀皆細刻周天度分每度爲三十六分以距線代管窺宿度餘分並依實測七曰日出入晝夜刻大明曆皆據汴京為準其刻數與大都不同今以本方北極出地高下黃道出入內外度立術推求永爲定式所創法凡五事一曰太陽盈縮二曰月行遲疾三曰黃赤道差四曰黃赤道內外度五曰白道交周
草木子曰古曆多用一定之法故未久而差由不知天爲動物而歲亦畧有差也古曆雖立差法五十年差一度又太過一百年差一度

又不及七十五年差一度稍爲近之尚未精密元朝以八十一年而
差一度筭已往減一筭筭將來加一筭始爲精密

曆法

洪武元年戊申改太史院爲司天監又置回回司天監

王氏曰按回回曆出西域西域諸國當崑崙之陽於諸裔中爲得風
氣之正故多異人若天竺梵學婆羅門伎術皆西域出也自隋唐以
來已見於中國今世所謂回回曆者傳爲西域馬可之地年號阿刺
必時異人馬哈麻之所作也以今考之其原實起於隋開皇十九年
己未之歲其法常以二百五十日爲一歲歲有十二宮宮有閏日凡
百二十有八年閏三十有一日又以三百五十四日爲一周周有十
二月月有閏日凡三十年閏十有一日歷千九百四十一年而宮月
甲子再會其白羊宮第一日日月五星之行與中國春正定氣日之

宿直同其用以推步分經緯之度著凌犯之占曆家以爲最密元之
季世其曆始東逮我高皇帝之造大統曆也得西人之精乎曆者於
是命欽天監以其曆與中國曆相參推步迄今用之今按歲之爲義
於文從步從戌謂推步從戌起也白羊宮於辰在戌豈推步在戌時
見星爲始故與御製文集有授翰林編修馬少亦里馬哈麻敕文謂
大將入元都得秘藏之書數十百冊乃乾元先聖之書我中國無解
其文者聞爾道學本宗深通其理命譯之今數月測天之道甚是精
詳洪武壬戌十二月也二人入翰林凡十餘年其所譯者卽此曆歟
三年庚戌始定爲欽天監太祖以元回回司天監司之爲言非古欽崇
天道之意遂改今名以掌察天文定曆數凡日月星辰風雨氣色之變
率其屬而占候焉密疏以聞

二十年丁卯選疇人年壯解書者赴京習天文推步之術

二十七年訪求通曉曆數數往知來試無不驗者封侯食祿千五百石
山東監生周敬心奏言國祚長短在德厚薄非曆數之可定三代有
道之長固有定論三代而下深仁厚德者漢唐宋而已如漢高之寬
仁繼以文景之恭儉昭宣之賢明光武之中興章帝之長者唐太宗
之力行仁義宋太宗之誠心愛民是以有道之長國祚最短者莫如
秦其次如隋又其次如五代始皇之酷虐煬帝之苛暴五代之窮鬼
是皆人事所致豈在曆數欽惟聖上應天眷命掃滅□□救亂誅暴
其功大矣朕神武過於漢高而寬仁不及賢明過於太宗而忠厚不
及是以御宇以來政教未敷四方未治伏乞效漢高之寬仁同太宗
之忠厚法三代之稅斂則帝王之祚可傳萬世又何心問諸小技之
人耶

三十一年革回回監

洪熙十四年定大統曆冬夏二至晝夜六十一刻

正德元年七月星變

五官監候楊源上疏言占候得大角及心宿中星動搖天璇天璣天
權星不明乞安居深宮絕遠遊獵罷弓馬嚴號令毋輕出入闕除內
侍寵倖遊逸小人節賞賜止工役親元老大臣日侍講習詩書疏下
禮部言源占候之言深切時弊源復疏言十月二十六日占候得連
日霧霧交作爲衆邪之氣陰冒於陽臣欺于君小人擅權爲下叛上
引譬甚切劉瑾怒矯旨杖源三十釋之源又疏言自正德二年來一
向占候得火星入太微垣帝座之前或東或西往來不一勸上宜思
患預防瑾大怒罵源爾何官亦學爲忠臣復矯旨痛杖三十謫戍肅
州行至懷慶卒

嘉靖三年正月五星聚營室

欽天監掌監事光祿少卿樂護上疏曰臣等預筭今年正月五星以次聚營室但太陽臨近當隱伏不見今候其象果然夫數不爽而象暗聚則其降精流氣亦必成祥自古五星之聚莫不有大禍惟視人君德政淑慝何如耳占書曰五星之聚是謂改易王者有德受慶子孫蕃昌無德受殃失其國家百姓流亡蓋天道無親福無常主故五星之聚有福有禍無德靡不受禍聚房周祚以昌聚箕齊桓用霸漢典聚井宋盛聚奎是四者皆當更革之際一福一禍培栽覆傾昭然在德惟天寶聚于尾箕而唐德弗稱旋有祿山之亂唐業遂衰皇上嗣聖中興五星適聚可不益修聖德愛養黎元以承此大慶乎臣職司占候竊惟禍福之徵莫大於此至於修德應天之實非臣等之言所能盡意更乞延訪文武羣臣博求修德愛民之道而實行之以及內外左右莫不修省協贊承此大慶不使天眷別有所顧則宗社生靈不勝幸甚占書又曰天下兵謀則五星聚於營室凡所以內修外攘以消□狄盜賊之謀者似亦不可不加之意也伏乞皇上亟與大臣圖之疏下禮部覆言堯舜授受曰曆數在躬允執厥中四海困窮天祿永終皇上起自潛邸入承大統正德年間權奸用事冗濫糜費蠹耗無餘天下之財盡歸權室公私赤立國非其國皇上起而救之生理未復重以水旱非常之災流移轉徙餓莩相望朝廷屢議賑恤而在官無可發之廩在民無可貸之儲相顧錯愕計無所出所謂四海困窮者積漸至此遺大投艱付托甚重亨屯拯溺求望甚切伏望仰稽乾象俯順時宜圖任老成斥遠羣小崇敬畏戒逸欲嚴諸一心自足以爲祈天永命之本其他齋醮祈禳異端小說不宜輕信以啓倖門傷治體至於足國裕民則今日之務莫急於此必先儉約必端好尚必慎差遣必重爵賞必戒興作稍在得已卽賜停止務求安靜

休養生息假以數年天與之時人盡其力則生理庶可復而國用亦自有餘矣臣等待罪禮官星家之說素所未習不敢旁引曲證以瀆天聽至於惠迪吉從逆凶作善降祥作惡降殃天命靡常歸於有德永言配命自求多福則歷聖言之若出一口傳曰畏聖人之言伏乞垂情經典堯舜爲師執一中以臨照百官賚四海以永綏天祿應天之實莫大於此其欲修攘以消盜賊□狄之譁者候命移咨兵部上議仍乞敕令百官同加寅畏勉修職業凡事有關國體民生至計者並許直言以共成嘉靖之治宗社幸甚生民幸甚

是年光祿少卿管欽天監事華湘上言歐陽修曰事在天下其易差者莫如曆夫所以差者由天周有餘日周不足也天周有餘則天常平運而舒日周不足則日常內轉而縮天日之差於中星驗焉堯之冬至初昏昴中而日在虛七度虛者北方之宿則日行北陸躔於玄

枵之子也今之冬至初昏室中而日在箕三度箕者東方之宿則日行東陸躔於析木之寅也許今去堯未四千年而差五十度矣再以赤道考之勝國至元辛巳改曆天正冬至赤道歲差一度五十秒今退天三度五十二分五十秒也黃道歲差九十二分九十八秒今退天三度二十五分七十四秒也故洪武中漏刻博士元統上言我朝承運以來曆雖以大統爲名而積分猶授時之數年遠數盈漸差天度距元辛巳至元統上言時歲在洪武甲子僅一百四十年迄今則二百四十二年授時曆法每歲差一分五十秒約七十年差一度今合差三度餘矣年愈遠而數愈盈然則治曆者豈可不隨時修改以求合於天哉夫不隨時修改求合於天則曆必差是以正德戊寅日食庚辰月食時刻分秒起復方位多與欽天監推筭不合古今善治曆者三家一曰漢大初曆以鍾律起二曰唐大衍曆以著策起三曰

元授時曆以晷影測就日體測之毫忽微眇不可得而遁者元史所謂自古及今推驗之精蓋未有出於此顧豈誣哉今欲正曆而不登臺測影臣竊以爲皆空言臆見也

丘濬論曆象之法曰洪武中刻漏博士元統言一代之興必有一代之曆隨時修改以合天道我朝承運以來曆雖以大統爲名而積分猶授時之數授時曆法以元至元辛巳爲曆元至今洪武甲子積一百四年以曆法推之得三億七千六百一十九萬九千七百七十五分經云大約七十五年而差一度每歲差十分五十秒辛巳至今年遠數盈漸差天度擬合修改今年洪武甲子歲前冬至爲大統曆元推演得授時曆辛巳閏准分二十萬二千五十分洪武甲子閏准分一十八萬二千七十分一十八秒受時曆氣准分五十五萬六百分洪武甲子氣准分五十五萬二百七十五分授時曆辛巳轉准分一

十三萬二百五十分洪武甲子轉准分二十萬九千六百九十分授時曆辛巳交准分二十六萬三百八十分洪武甲子交准分一十一萬五千一百五十分八秒當元統上言時歲在甲子也巳云年遠數盈漸差天度矧今又歷一甲子而過其半其年愈遠其數愈多其所差者當益甚也臣愚以爲曆者國家之大事所以膺在躬之數承上天之託以敬天道以授人時者端有在於此臣請詔求天下通星曆之學如郭守敬者以任考驗之責明天人之理如許衡者以任講究之方失今不爲後愈差舛伏惟聖明留神聽察

鄭善夫題天道幽玄其數精微今欲以人合天非明理達數之原者鮮克勝此是以歲差之法自晉虞喜始定以歲策五十年差天運一度何承天復定以一百年隋劉焯取二家中數復定以七十五年唐一行復定以八十三年元許衡王恂郭守敬復定以六十六年有餘

凡經數十人歷驗千餘年。至元授時曆以爲精密矣。只今新法據許
衡等六十六年有餘之數推演仍又不合。天道豈易言哉。且如定歲
差之法積四期餘一日而分加於四期。是故二至之時只在絲忽之
間。自古難准。要須酌量以定者。如定日之法。一日百刻。所以變爲九
百四十分者。以氣朔有不盡之數難分故也。凡每月三十日二氣盈
四百一十一分二十五秒。一朔虛四百四十一分。積虛盈之數以置
閏。是故定朔必視四百四十一分前後爲朧胸。只在一分之間。如日
月交食。惟日食爲最難測。至於月食分數。惟以距交遠近別無四時
加減。蓋月小日暗。虛大月入暗。虛而食。故八方所見皆同。若日爲月
體所掩而食。則日大而月小。日上而月下。日遠而月近。日行有四時
之異。月行有九道之異。故旁觀者遠近自不得而同矣。必須據地定
表。因時求合而後准也。如正德九年八月朔日食。曆官所報食八分
六十七秒。而閩廣之地遂至食既。其時刻分秒安得而同。今按交食
以更曆元時。分刻刻分分分秒。極精極細。及至於半秒難分之處。
要亦須酌量以定者。若差半秒積以歲月。躔離朧胸皆不合原筭矣。
是故隨時考驗以求合於天者。苟非其人。豈易言哉。

華湘論歲差法云。堯時冬至躔在虛一度。夏至在柳十四度。春分在
胃十二度。秋分在氐十度。至唐開元大衍曆。冬至日躔在斗十度。夏
至在井十度。春分在奎七度。秋分在軫十四度。宋曆元曆。冬至在斗
二度。夏至在井十六度。春分在奎初度。秋分在軫七度。此歷代之曆
可驗者如此。然雖有進退其度不出次舍前後。蓋天運星行動體也。
未免或前或却。小有不齊。曆家步筭乃死法耳。安得與天相符。故曰
歲差後世隨時占候修改。求與天合。又不得不然也。漢自鄧平改曆
之後。洛下閎八百年當差一度。當時史官考諸上古中星。知大初曆

已差五度而閏未究蓋古之爲曆未有歲差之法其論冬至日躔之宿一定而不移不知天日會道不得均齊餘分積久度數必爽今歲之日躔在冬至者視去歲冬至之躔常有不齊之分至晉虞喜始覺其差乃以天爲天歲爲歲立差法以追其變而筭之約以五十年日退一度然失之大過宋何承天倍增其數約以百年退一度而又不及至隋劉焯取二家中數以七十五年爲近之然亦未甚密至唐僧一行乃以大衍曆推之得八十三年而差一度自唐以來曆家皆宗其法大衍法有云日躔一歲之周天度未備而日已至隨每歲有不大積而至於八十三年則差及之分約天一度爲三千四十分計一歲不及之分三十有六三千四十分爲差一度矣然猶未也至元朝郭守敬筭之約六十六年而差一度筭已往減一筭筭將來加一筭而歲差始爲精密至今二百餘年臺官推演又多不合天道識者往往奏請再改曆元以正歲差嗟乎天動物也進退盈縮未免小有不齊一定之法不可拘

也劉焯取虞何二家中數定以七十五年當時善矣至唐而復差僧一行以八十三年時會合是矣至宋元之交而復差許衡郭守敬定以六十六年當時以爲精矣至今又復有差然則一定之法顧可向執也哉况法亦自有權宜者如定歲之法四期餘一日之數分於四期則二至之定每疑於絲忽之間須酌量以定無常準者定日之法一日變爲九百四十畫者以氣朔有不盡之數難分也每月三十日而二氣盈四百一十一畫二十五秒一朔虛四百四十一畫積盈虛之數以成閏故定朔必視四百四十一畫之前後以爲朧朧故定朔每疑於一畫之間要亦須酌量以定無常準者如日月交食之法時刻分秒最爲精微其至半秒難分之處亦須酌量以定無常準焉天至之絲忽朔之一畫食之半秒積之歲久則皆差失不合原筭矣以天道不齊之動加以歲久必差之法欲守一定之筭夫安可得是故

隨時考驗以求合於天此爲至當堯時冬至在虛於今豈可固執也哉

支大綸曰按授時曆法雖起于至元辛巳而不以辛巳爲曆元其法以七千二百五十七萬六千爲一元之中平分天地人三元每元計二千四百二十九萬二千自太乙甲子至嘉靖四十三年甲子已五千二百九十五萬八千四百矣是天地二元也今當一千九百六十一萬七千六百已在人及後推將來每年增一前考已往每歲減一以太乙甲子爲曆元而不從辛巳也今以辛巳爲曆元者曆家以世遠難竟故截去始元而以辛巳耳歲差之法起於子半虛六度約下六十年而退一度自堯至洪武甲子退四十九度五十七分故冬至日躔箕七度七十七分正統甲子退五十度四十一分故冬至日躔箕六度九十六分弘治甲子退五十一度二十四分故冬至日躔

箕六度十三分嘉靖甲子退五十二度七分故冬至日躔箕五度三十分以後每度約退一分三十八秒四十九微自嘉靖初至今上壬午六十一年又退九十三分非復至元之舊也日食多寡則里差之法所當講者日輪大月魄小故自下望之相掩南北不同每千里約差一分東西不同每千里約差數刻正德甲戌日食推步八分六十七秒而閩廣遂至食既萬曆乙亥日食京師未甚而蘇松亦至晝晦則南北地勢使然也

天變

金文宗天曆二年五月天鼓鳴於西北七月乙巳天鼓鳴於東北元順帝二十七年正月絳州聞天鼓鳴其聲如空中戰鬪者明宣德元年辛未東南天鳴聲如萬鼓

天順七年癸未春二月晦夜空中有聲大學士李賢上疏云傳言無形

有聲謂之鼓妖。上不恤民則有此異。今陛下軫念元元，凡一切不便于民者，悉皆停罷。則災變可弭。上覽之，遂命賢條具寬恤事，密封以聞。賢因疏十事上之，皆賜允行。

弘治八年二月，陝西天門開，人馬百萬自下而上。十年丁巳夏五月，京師風霾，各省天鳴地震，詔求直言。

正德元年正月，天鳴地震。七月，天鳴地動。

嘉靖七年戊子冬十二月，望白氣亘天，建起乾指坤。

十一年五月初五，天鼓如雷，火光落地。

隆慶二年七月，山西平陽府絳州奏西北天裂，自丑至寅乃合。

日食

宋理宗嘉熙元年十二月戊寅朔，日有食之。日與金木水火四星俱躔斗食將既。

六年正月朔，日有食之，輟朝。詔天基節紫宸殿上壽，集英殿大宴，並免恭帝德祐元年六月朔，日有食之。既晝，晦如夜。

遼景宗保寧九年十一月，司天台奏日當食不虧。

聖宗開泰九年七月庚戌朔，日有食之。詔以近臣代拜救日。

金海陵元貞二年五月癸丑朔，日有食之。避正殿，敕百官勿治事。

正隆三年三月辛酉朔，日食，候之不見。命自今遇日食，面奏不須頒告。世宗大定二年五月戊辰朔，日有食之。伐鼓用幣，命壽王京代拜行禮。上徹樂減膳，不視朝為制。凡遇日月虧食，禁酒樂屠宰一日。

三年六月庚申朔，日有食之。上視朝，命官代拜。有司不治務，過時乃罷。後為常。

七年四月戊辰朔，日有食之。上避正殿，伐鼓應天門內，百官各于本司庭立明復乃止。

九年八月甲申朔有司奏日當食因雨不見是日近奉安太社乃伐鼓于社用幣于應天門內

宣宗貞祐二年九月壬戌朔日有食之大星皆見

元成宗大德三年八月朔日食不應太史言是日巳時日食二分有奇至期不食衆懼保章正齋履謙日當食不食在古有之矧巳時近午陽盛陰微故當食不食遂考唐開元以來當食不食者十事以聞

明永樂十一年癸巳春正月辛巳朔日有食之

先是欽天監奏日食占在元旦巳而鴻臚寺奏習元旦賀儀成祖召禮部翰林官問尚書呂震對曰日食與朝賀之時先後不相妨侍郎儀智曰終是同日免賀爲當成祖再顧翰林諸臣曰古有日食行賀禮否楊士奇曰日食天變之大者前代多不受朝宋仁宗時元旦日食富弼請罷宴徹樂呂夷簡不從弼曰萬一契丹行之爲中國羞後

有自契丹回者言口是日罷宴仁宗深悔今免賀爲當詔從之

宣德五年庚戌秋八月巳巳朔日當食陰雲蔽之禮部尚書胡濙奏請稱賀不許因降敕曰古之人君所謹者莫大乎天戒日食又天戒之大者惟能修德行政用賢去奸而後當食不食今以陰雲不見得非朕昧于省過而然與况離明照四方陰雲所蔽有限京師不見四方必有見者此之不食天可欺與其止勿賀

正統八年六月日食冬十一月日又食時王振亂政諱言災警上于天象變異叠見

成化九年癸丑夏四月辛酉朔日食免朝

正德二年丁卯春正月乙亥朔日食既

嘉靖十九年庚子春三月癸巳朔日食禮部以測候不食聞世宗大悅二十一年壬寅秋七月巳酉朔日有食之上敕曰天心下眷累及太陽

臣子欺君父外陰欺內陽之象也夏言以臣欺君罪不下郭勛姑念供事久勞特宥死去用承天戒臺諫爲朝廷耳目而結合欺妄命吏部考覈以聞時劾去臺諫七十三人奪級外補有差

三十二年癸卯春正月戊寅朔日食御史趙錦徐栻上言修內治栻補外錦削籍

四十年春二月辛卯朔曆官推步申酉間當日食陰雲不見閣臣嚴嵩曰日雖有雲而申酉時日色不加晦是不食也請舉大謝禮從之

隆慶四年庚午春正月朔日食禮部奏請免朝上避殿減膳修省三日萬曆三年乙亥夏四月朔日食未刻晦諸星照曜至申刻漸明

日變

宋恭帝德祐二年二月日中有黑子大如鷲卵相盪久之遼熙宗天會十四年十一月丙寅日中有黑子斜角交行

海陵天德二年正月甲辰日有暈珥白虹貫之

貞元三年四月丁丑朔昏霧四塞日無光凡十有七日

正隆五年八月庚午日中有黑子狀如人

世宗大定二十九年正月己卯己初日有暈左右有珥上有背氣兩重其色紫赤而厚復有白虹貫之亘天其東有戟氣長四尺餘五刻而散丁巳己初日有兩珥上有背氣兩重其色青赤而淡頃之背氣于日上爲冠已而俱散

二月甲子辰刻日上有重暈兩珥抱而復背背而復抱凡二三次乙丑日暈兩珥有負氣承氣而白虹亘天左右有戟氣

世宗嘗問紇石烈良弼曰每旦暮日色皆赤何也良弼對曰且而色赤應在東高麗當之暮而色赤應在西夏國當之願陛下修德以應天則災變自弭矣既而夏國有任德敬之亂高麗有趙位寵之難其

言皆應

衛紹王大安二年正月庚戌日中有流星出大如盆

哀宗正大四年十一月乙未日上有虹背而向外者二約長丈餘兩傍俱有白虹貫之

八年三月庚戌酉正日忽白而失色乍明乍暗左右有氣似日而無光與日相陵而日光四出搖蕩至沒

元世祖至元二十九年正月朔日食有物漸侵入日中不能既日體如金環然左右有珥上有抱氣

仁宗延祐元年三月己亥日暈亘天連環貫日
順帝至正十六年三月有兩日相盪

二十五年三月日有暈內赤外青白虹如連環貫之
二十七年二月十三日仰視日旁一月一星月如初弦者

明建文元年太史奏赤日無光時教諭程濟上言北兵將起應在明年上以爲妄囚之

嘉靖二十四年十二月自二十二日至二十六日日輪外有黑氣如盤與日光摩蕩

三十四年十二月晦日日光忽暗青黑紫色日影如盤數十相摩視久則百千飛盪滿天向西北而散

月食 月變

遼穆宗應曆十七年十一月司天臺奏月當食不虧上以爲瑞懼飲達旦

金太宗天會十一年五月乙丑月忽失行而南頃之復故

熙宗天會十三年十一月乙酉月食命有司用幣以救著爲食

哀宗正大七年十月己巳月暈至五更復有大連環貫之絡北斗內有

戰氣

元順帝至正十三年三月月食太白是時徐真一倪蠻子陳友諒等亂漢沔

明永樂元年正月月當食不食時禮部尚書李至剛請率百官稱賀上曰王者能修德行政任賢去邪然後日月當食不食適以陰雨不見豈果不食耶勿賀

彗孛

宋理宗景定五年七月甲戌夜彗星出柳長竟天巳卯退于鬼八月辛巳退于井戊午退伏甲子復見于參辛未化爲霞氣

時考功郎官趙景緯應詔上奏曰今日求所以解天意者不過悅人心而已百姓之心卽天心也錮私藏而專天下之同欲則人不悅保私人而違天下之公議則人不悅閭閻之糟糠不厭而燕私之供奉

自如則人不悅百姓之膏血日涸而符移之星火甚急則人不悅不公於已而欲絕天下之私則人不悅不澄其源而欲止天下之貪則人不悅夫必有是數者斯足以召怨而致災願陛下損內帑以絕壅利之謗出嬪嬙以節用度之奢弄權之貂寺素爲天下之所共惡者屏之絕之毒民之恩澤侯嘗爲百姓之所憤者黜之棄之擇忠鯁敢言之士置之臺諫以通關鬲之壅選慈惠忠信之人使爲守宰以保元氣之殘又必稽乾淳以來凡利源窠名之在百司庶府者悉隸其舊以濟經用之急公田派買不均之弊聽民自陳隨宜通變以安田里之生則人心悅天意解矣人之常情懼心每發于災異初見之時不能不潛移於諂諛交至之後萬一過聽左右寬譬之言曲爲他說以自解毛舉細故以塞責而恐懼之初心弛則下拂人心上違天意國之安危或未可知又曰損玉食不若損內帑卻貢奉之爲實避正

朝不若塞侍門廣忠諫之爲實肆大眚固所以廣仁恩不若擇循良
黜貪暴之爲實蓋天意方回而未豫人心乍悅而旋疑此正陰陽勝
復之會眷命隆替之機也

金宣宗興定六年八月己卯彗星出于角亢右攝提周鼎之間指大角
有司奏除舊布新之象宜改元修政以消天變于是改是年元光元年
九月丁未滅

哀宗天興元年九月己酉彗星見東方色正白長丈餘灣曲如象牙出
角軫南行至十二日長二丈十六日月燭不見二十七日五更復見東
南約長四丈餘至十月一日始滅凡四十有八日司天奏其咎在北京
宗曰我亦北人今日之事我當滅也何乃不先不後適丁此乎

元成宗大德五年九月乙丑自八月庚辰彗出井二十四度四十分如
南河大星色白長五尺直西北後經文昌斗魁南掃太陽又掃北斗天
機紫微垣三公貫索星長丈餘至天市垣巴蜀之東梁楚之南宋星
長盈尺凡四十六日而滅

八年三月乙丑自去歲十二月庚戌彗星見約盈尺指東南白色測在
室十一度漸長丈餘復指西北掃騰蛇入紫微垣至是滅凡七十四日
順帝至正三年五月彗星見于東北如天船星大色白約長尺餘彗指
西南測在昴五度戊辰往西南行日益漸速至六月辛未芒彗愈長約
二尺餘丁丑掃上丞己卯光芒愈甚約長三尺餘入圍衛壬午掃華蓋
杠星乙酉掃鈎陳大星及天皇帝丙戌貫四輔經樞心甲午出圍衛
丁酉出紫微垣戊戌犯貫索掃天紀七月庚子掃河間癸卯經鄭晉入
天市垣丙午掃列肆己酉太陰光盛微辨芒彗出天市垣掃梁星至辛
酉光芒微小瞻在房宿鍵閉之上罰星中星正西難測日漸南行至是
凡見六十有三日自昴至房凡歷一十五宿而滅

二十八春正月庚寅彗星出于昴畢之間。○三月又出于昴北。是歲元亡

瓊山丘氏曰史綱終于彗見于昴何以天道終也終于天道何昴口星也彗除舊布新之象也唐李淳風作晉天文志成帝咸和七年十

二月熒惑守昴八年七月熒惑入昴占曰口王死是月石勒果死九年八月又犯昴十一月石虎廢石弘幽殺之淳風曰是時雖二石僭

號而其強弱常占于昴不關太微紫宮也自是精於天文者首稱淳風其言如此我聖祖以正月即皇帝位彗星即見于昴畢之間三月

又出于昴北七月而元亡天人之際淵乎深哉明洪武九年秋七月五日有星孛于北斗欽天監奏仇星見殺氣多遂

釋被刑之家親屬還鄉諸司獄為一空宣德八年秋八月彗出天倉旁入貫索掃七公鄭曉曰是月有怪星見

或曰歸邪星

成化元年二月彗星見西北長三丈餘三閱月乃沒

七年辛卯冬十一月彗星見于東北大赦天下是星出天市入太微垣其象首約而尾散且長光燁然炫目狀如掃帚時上久不接見廷臣議

政事上下情隔言者皆謂此召變正德元年秋七月己丑彗星見參井掃太微垣戊戌乃滅是年彗星掃文昌臺官云

應在內閣後劉瑾用事逐大學士劉健謝遷一時九卿臺諫無不受禍蓋文昌被掃之應十六年春正月有星孛于東南垣之橫絕東西復為鉤屈

嘉靖十二年八月初三彗星見東井漸長至丈餘掃太微垣諸星至十二月凡一百一十五日方滅

太陰五星凌犯金海陵問司天馬貴中曰近日天道何如貴中曰前年八月二十九日

太白入太微右掖門九月二日至端門九日至左掖門出並歷左右執



法太微爲天子南宮太白兵將之象其占兵入天子之庭海陵曰今將征伐而兵將出入太微正其事也貴中又言當端門而出其占爲受制歷左右執法爲受事此當有出使者或爲兵或爲賊海陵曰兵興之際小賊固不能無也是歲海陵南伐遇弑

哀宗正大元年正月丙午月犯昴三月癸丑犯熒惑是月熒惑逆行犯左執法四月癸酉犯右執法

元世祖中統元年五月乙未熒惑入南斗留五十餘日

明洪武九年閏九月以五星紊度日月相刑詔求直言淮安海州學正曾秉正上修德弭災疏上嘉之召至京擢思文監丞

建文元年熒惑守心時四川岳池縣教諭程濟占應兵起北方期在明年因上書于朝朝廷怒其妄言逮京詔獄明年靖難兵果起北平正統十四年秋七月熒惑入南斗未幾土木報至

正德元年七月五星陵犯

萬曆三十年九月二十六日內靈臺奏九月二十三日辛巳夜五更西北地方有星如雞卵大青白色尾跡有光起自下台星東北行至近西南方有星如碗大青白色尾跡炸散光照地起自參宿西南行入天苑星後有二小星隨之後有大小流星數百紛錯隨行

星變
宋寧宗十五年八月長星見西方蒙古耶律楚材謂其主曰女直將易主矣

遼聖宗統和八年三月庚辰太白熒惑闕凡十有五次

元順帝至正十年六月壬子有星入于北斗大如月震聲如雷三日復

還
十八年十二月太白生黑芒環繞乍東乍西乍動乍靜癸未復生黑芒

忽明忽暗乍東乍西

二十四年六月甲辰火星夜見如晝

流星星隕星搖

宋理宗端平二年吏部尚書魏了翁奏曰臣伏見此日以來天文示異何其稠也六月流星晝隕其占爲覆軍爲陰謀越十七日己丑熒惑入太微垣其占爲饑爲逆爲喪七月戊戌太白經天其占爲兵爲臣強此金火二星之變至於今未退也而火迫內垣尤爲急切越六日丙午以後金星行人東井大孽非天作變不虛生陛下亦思所以省己愆回天心乎漢相王嘉謂動民以行不以言應天以實不以文下民微細猶不可詐况於上天神明而可欺乎人皆以爲至言臣謂如此言者在二漢以來絕少抑不知民與天一也安有爲欺民之事而可以應天亦安有爲欺天之事而可以動民者此猶未免於擇焉不精然其立言之大意

則固已深中乎千有餘年應天動民之實病矣

恭帝德祐二年有二星闕於中天一星隕

帝昺祥興元年有大星南流海中小星千餘隨之聲如雷數刻乃已

八月有星墜廣州南初隕色紅大如箕中爆裂爲火既墜地聲如鳴鼓一時頃止

金熙宗天會十四年三月丁酉夜中星搖

衛紹王二年正月庚戌朔日中有流星出大如盆其色碧西行漸如車輪尾長數丈没于蜀中至地復起光散如火移刻乃滅

宣宗興定三年七月壬寅初昏有星自西南來其光燭地狀如月而稍不圓色青白有小星千百環之若迸火然墜于東北少頃有聲如鼓

元泰定帝四年十月乙巳晝有流星○時有大星隕於礪嘉縣之虛初山爲黑石狀如東瓜上有點如星擊之鏘然有聲人不言舉之則動言

則弗動土人以為怪積薪焚之雷雨交作乃止

元順帝至正十六年十一月大名路大名縣有星如火自東南流尾如曳篲墜入于地化為石青黑光瑩狀如狗頭其斷處類新割者有司以進大史驗視云天狗也命藏于庫

二十八年七月六日夜一星大如杯碗色白而微青尾長四五尺光欲燭天戛然有聲由東北方飛入月中而止此時月如仰瓦正乘之無偏倚若人以手合置其中者

明成化二十三年冬十月丙子有大星飛流亘天詔求直言是星起西北亘東南光茫燭地蜿蜒如龍朝宁之間人馬辟易時孝宗初即位星晝見 經天

宋寧宗開禧十二年二月戊戌太白晝見三月丁亥又見六月辛卯經天

遼道宗咸雍三年七月熒惑晝見凡三十五日

金熙宗天眷二年五月戊子八月丁丑太白俱晝見

皇統七年正月丁亥七月己巳太白俱經天

海陵天德二年九月乙亥太白晝見至明年正月辛卯後不見

四年正月癸卯五月己亥丁巳十二月乙卯朔及閏月己亥俱太白經天

正隆二年九月己未太白經天至明年正月二十一日不見

五年二月丁卯太白晝見四月甲戌復見凡百六十有九日乃伏

先是海陵問伺天提點馬貴中曰朕欲自將伐宋天道如何貴中對曰去年十月甲戌熒惑順入太微至屏星留退西出占書熒惑常以十月入太微庭受制出伺無道之國又去年十二月太微晝見經天占為兵喪為不臣為更主又主有兵兵罷無兵兵起

世宗大定六年四月辛丑太白晝見八十有八日伏。六月太白晝見辛巳經天。九月壬子太白晝見百有三日乃伏丙辰經天。十月壬辰及十一月庚申日十二月戊子俱晝見經天。二十三年九月甲申歲星晝見五十有五伏。十月辛酉太白晝見百四十有九日乃伏。十一月丁卯歲星晝見三十有三日伏。閏十一月庚申歲星晝見九十日伏。

章宗太和六年八月己未卯正初刻太白晝見在日前庚申卯正初刻太白晝見在日後壬申太白晝見經天。

宣宗興定五年正月辛丑太白晝見于牛二百三十有二日乃伏。

時司天夾谷德玉等奏以爲臣強之象請祭以禳之宣宗曰斗室吳分蓋宋境也他國有災吾何禳乎。

元成宗元貞七年九月丙寅太白晝見十月丁亥十一月己未十二月

丙戌俱太白經天。

泰定帝泰定三年七月戊辰太白經天至于十二月。四年九月己巳

太白經天至于十二月。

順帝元統二年二月丁亥四月丁丑太白俱經天戊寅太白晝見辛巳壬午皆如之。七月己亥太白經天甲辰丙午皆如之。己酉太白晝見庚戌癸丑甲寅俱太白經天。八月丙辰丁巳戊午己未癸亥丙寅戊辰辛未壬申癸酉甲戌丁丑己卯庚辰俱經天。九月庚寅甲午乙未己亥壬寅俱經天。十一月甲申太白經天丙戌亦如之。十二月甲子丙寅丁卯庚午壬申皆如之癸酉歲星晝見乙亥太白歲星皆晝見戊寅太白經天歲星晝見。

明洪武元年三月壬申太白晝見九月上遣吳英往北平諭徐達曰七月火星犯上將此月金星又犯之占有奸人刺客當謹備之可徧諭諸

將一體嚴密雖左右將校勿令相近其故元關官尤宜防範惟南去者
可以使令

二十年丁卯春二月五星皆見 夏五月丁丑三辰晝見 六月太白
經天

景泰二年秋八月熒惑晝見

四年夏五月丁丑歲星晝見 六月甲辰歲星又晝見

弘治十八年乙丑秋九月恒星晝見

正德元年七月太白經天五星陵犯星斗晝見

嘉靖四十三年六月十七日有星在日輪外白色燦然或云此即太白
晝見也

五星會舍

宋理宗寶慶二年二月壬午太白歲星一填星合於女 十一月熒惑填

星合於女

金熙宗皇統九年七月甲辰太白辰星歲星會于張

世宗大定十七年九月庚戌歲星熒惑太白聚于尾

二十六年八月乙亥朔日月五星會于軫

哀宗正大三年十一月癸酉五星並見于西南

天興元年七月乙巳太白歲星熒惑太陰俱會于軫翼司天武亢極言
天變上惟嘆息而已

八月甲戌太白歲星交

元太宗癸卯年夏五月五星聚見于西南

世祖至元十五年十一月辛亥太白熒惑填星聚于房

成宗大德二年二月辛酉歲星熒惑太白聚危

五年三月己巳熒惑填星相合

六年七月癸巳朔熒惑填星辰星聚井

英宗至治元年正月甲辰辰星太白熒惑填星聚于奎

泰定帝泰定二年二月庚寅熒惑歲星填星聚于畢

順帝至正十三年正月戊戌熒惑太白辰星聚于奎

二十五年七月丁丑填星歲星熒惑聚于角亢 閏十月戊辰太白辰

星熒惑聚于斗

明嘉靖三年甲申春正月元日丙寅歲填次營室丙子五星咸聚辛巳

日纏室初度月食于翼五星皆伏而太白獨先過壁

瑞星

遼穆宗應曆十一年二月丙寅蕭思溫奏老人星見乞行赦宥

明永樂十四年八月癸酉旦壽星見呂震率文武百官請上表賀上不

許

客星

元世祖至元十年三月癸酉客星赤白如粉絮起畢度五車北復自文

昌貫斗杓歷梗河至左攝提凡二十一日

仁宗延祐二年十一月丙午客星變為彗犯紫微垣歷軫至壁十五宿

明年二月庚寅乃滅

明天順四年九月癸亥夜客星色蒼白光芒長三丈餘尾指西南變為

彗星

雲氣

遼太祖神冊二年四月圍幽州不克六月望城中有氣如烟火狀上曰

未可攻也班師

道宗壽隆七年正月壬戌朔夜白氣如練自天而降黑雲起于西北疾

飛有聲北有青赤黑白氣相雜而落

續文獻通考卷之二十一

續文獻通考卷之二十一
金太祖生時常有五色雲氣若二千斛困廩狀屢見東方遼司天孔致和曰其下當生異人天以象告非人力所能爲也

海陵正隆六年六月丙午慶雲見是日曹王烏祿卽位于遼陽

衛紹王至寧元年紫雲覆城上數日俄而宣宗入繼大統

宣宗興定三年七月庚申五色雲見十月乙丑平涼府慶雲見遣官驗實以告太廟詔國中

哀宗正大二年二月甲寅有黃黑禱

明洪武十八年乙丑夏四月五色雲再見禮部請稱賀不許

正德丁卯慶雲見翼軫分


世宗以八月十日生占者以爲河清慶雲之應

虹蜺
嘉靖十八年二月乙巳庚午慶雲見五色縹緲夏言以聞命擇日昭謝

元泰定帝泰定元年夏溫州虹見九頭色如血

順帝至正二十六年白虹五道亘天其第三道貫日又氣橫貫東南良久乃滅

續文獻通考鈔卷之二十一



續文獻通考鈔卷之二十一終

文化甲戌

